

M 33  
26318



A. МАТВЕЕВ

# НАЙӦС АДДЗЫВЛӢ

БИБЛИОТЕКА  
Респ. Краев. Музея  
Коми АССР  
город Сыктывкар.



А. МАТВЕЕВ

И  
НАЙОС  
АДДЗЫВЛІ

Рассказы

26318



КОМИ КНИЖНОЇ ИЗДАТЕЛЬСТВО

Сыктывкар 1959 во

БИБЛИОТЕКА  
Респ. Краев. Музея  
Кони АССР  
город Сыктывкар.



## ПЕСТЕРА-НАБЕРУШКА АА



аськыд ю вылын асья шонді водзын ворсісны посныдик гыяс. Найö дзирдалісны син ёрмөн, и кажитчис, мый лөзов гыясылысь йывъяссö кисьтöма чистöй эзысьысь. Сэтөр куст бокті лэбаліс пырыстыдалана бордъя юрсигусь. Сійö тэрыба тувъяліс увлань-вывлань, а сэсся öшйыліс сынöдас öти местаö, медым чöсмасьыштны сэтөр коръясысь кылысь чöскыд дукөн. Асья шонді вылö нимкодясисны и жаворонокъяс, кодъяс лөз небесаянь дугдывтöг дзольгисны ассыныс прöстöй, но гора сыланкывъяссö.

Эжва мөдлапöвсянь вөрзис пыжа. Пыжын пукаліс том морт да сыніс кык лопта пелысөн. Пелыс лопъяс вывті сяльгигтырйи визувтисны ва струаяс. Тайö вöлі Алексей Полугрудов. Сылөн косіник чужöмті визувтис пöсь. Дурысь төв летіс сылысь еджгов юрсисö. Яра югъялісны кизьяс важиник гимнастёрка вылын.

Ю шөрö воөм бöрын Алексей аддзис джуджыд бужöдті надзöникөн лэчысь мужичöйöс. «Тайö, дерт, кодкө видз вылö мунысь жö. Сёрмыштöма со. Йöзыс нин мудзтöдзыс уджалісны, а тайö век на локтö»,— думыштіс Алексей да кутіс тэрыбджыка кураьсны пелысөн.

Локтысь морт воис вадорö да сувтіс паськыд из вылö. Алексей тöдіс — тайö Прокопий Прокопьевич. Ёнлун да туша сертиыс томдырсянныс сійöс соседьясыс нимтылісны Ош Проньөн. Со сылөн гöгрöс гөрд тошкыс. Кызди и век, гынторйысь вöчөм шапкаа, дженьыд

гөленя сапöга. Киас сылөн наберушка, а мышкас — пестер. «Нянь да прöдукта, тыдалö, нуö бригадалы», — думыштис Полугрудов.

Прокопий перйис зепсыс каллян, табак көшель, тэрмасьтöг тыртис каллянсö табакөн, чиркнитис истöг. Сийö зилис не видзöдны матыстчысь пыжа вылö, кысь ылісянь на тöдіс Полугрудовсö. Прокопийлы талун эз вöв окота паныдасьны йöзкöд, а медся нин Алексейкöд.

Прокопий Прокопьевич ачыс век дивитліс сэтшöмъясös, кодъяс зільлісны ылыстчыны колхозной уджысь, но талун, татшöм мича, гажа лунö, ачыс мөвпыштіс ветлыны рыжик вотны. Сийөн и сёрмöдчис лэччыны перевоз дорö, медым йöзкöд не паныдасьны. Öні, берег дорö воём бöрын, кысянь вöлі тыдалöны мöдлапöвса паськыд видзьяс, көні уджалісны колхозникъяс, Прокопийлы лои яндзим.

Эз вöв лöсьыд и Алексейсянь. Полугрудов колис фронт вылö кокпöвсö. Гортö воём бöрын велöдчис счетоводной курсъяс вылын да кутис уджавны колхозын счетоводөн. Но лунъясын счетовод эз радейт пукавны правлениеын. Сийö кызкö сяммыліс волювны весиг ылын уджалысь бригадаясö, көні прöверяйтис, правильно-ö бригадиръяс тэчалöны колхозникъяслы трудоденьяс, тöлкөн да ладөн сёрнитліс йöзкöд колхозной олöмын быд важной вопрос кузя, и быдногыс зилис бырöдны став нелючкияс да кыпöдны йöзös ещö на бурджыка уджалöм вылö. Тöлка да варов счетовод кужліс быдөнлы шуны сэтшöм кыв, коді медся ёна вермыліс лöсявны торъя колхозникъяслөн характер серти. Сы вöсна сийös ставөн уважайтисны. А уважайтöмкöд тшöттш, дерт, и видзчысисны сы дырйи нелючки вöчöмысь. Та вöсна и Прокопий зилис кызкö-мыйкö не паныдасьны Алексейкöд, но паныдасьны öні ковмис быть. Қазялас кө Алексей, мый сийö мунö тшакла, критикуйтас да чорыда янöдас. Сылөн öд кывйыс, ок, и востер! Сийö жö и парторганизацияса секретарös вежысь.

Пыж воис ляпкыдинö, люкасис нырнас лыаö, эз сибав берегöдз. Прокопий матыстчис да шыасис сибдöм гөлöсөн:

- Олан-вылан, Алексей Иванович! Вуджöд мöдарас.
- Сёрмыштін тай талун, Прокопий Прокопьевич.
- Сёрмышті эськö да, нинöм... — вочавидзис Прокопий кытчöкө бокö видзöдіг.

— Пуксыы.

Прокопий Прокопьевич тувчис ваӧ, йӧткиштӧс пыж нырсӧ да чеччыштӧс пыжӧ. Пыж катовтчылис сэтшӧма, мый ваыс муртса эз ыльнит пыжӧ, но Полугрудов уди-тӧс нӧровтчыны пыж мӧдар бокӧ. Алексей кыскыштӧс асланыс кӧстыльсӧ, медым сетны места Прокопийлы пуксыыны, кодӧ пӧрччис пестерсӧ да пуктӧс кок улас, сэсся босьтӧс пелыс да сэтшӧма зӧбйыштчис, мый пыжыс тювмунӧ ва веркӧстӧ сыв куим кымын. Сӧйӧ кутӧс сынны сэтшӧм вынӧн, мый пелысыс, кажитчӧ, весиг куснясис сы кыин.

Пыр варов овлысь Прокопийлӧн чӧв олӧмыс чуймӧ-дӧс Алексейӧс. Сӧйӧ сюся видзӧдлӧс Прокопий чужӧм вылӧ, кодӧ вӧлӧ тош кодъыс жӧ гӧрд. Паськыд пель-помъяса, ыджыд тушаа Прокопий дядь сиктын лыд-дыссылыс медся ӧн мортӧн. Кӧть сылы вӧлӧ нин ар квайтымын гӧгӧр, но эз на тӧдчы, мый сӧйӧ пӧрысьысла мыйкӧ мында слабмыштӧма. Но талун сы видзӧдласын мыйкӧ эз вӧв ладнӧ. «Мый нӧ талун ськӧд?— мӧвпалӧс Алексей.— Кыв оз шу, боклань видзӧдӧ. Абу-ӧ нин лӧгасьӧма мыйыськӧ?»

Алексей чӧвтлӧс синсӧ пестер вылӧ да друг гӧгӧр-воис, мый Прокопий дядь талун мӧдӧдчӧма видз вылӧ пыдди тшакла. Сы вӧсна сӧйӧ и сӧрмӧдчис, медым йӧзыс эз аддзывны да эз дивитны. Сы вӧсна сӧйӧ талун и аслыснога, оз балагурит, кызди век, зӧльӧ, тыдалӧ, ӧдйӧджык вӧдчыны мӧдар берегӧ да макнитны вӧрӧ. А, гашкӧ, пестерас сӧнӧ бригадалы сӧянтор?

Алексей копытчис да кыпӧдлӧс кинас пестерсӧ. Сӧйӧ вӧлӧ кокни, тыртӧм. Наберушка вӧлӧ вылыстыс кӧрталӧма сера чышъянӧн. Алексей вештыштӧс чышъянсӧ — наберушка пыдӧсысь аддзис сӧмын нянь кусӧк.

— Тэ, Прокопьевич, тшакла кӧ нин мӧдӧдчӧмыд-а? Тшакыс ӧмӧй петӧма нин?— друг юалӧс Алексей.

— Петӧмаӧсь пӧ тай рыжикъяс, кӧсья вотыштны,— сӧдзжӧ бокӧ видзӧдӧмӧн вочавидзис Прокопий.— И чӧд пӧ таво уна. Колӧ кӧть ӧтчыл ветлыны, а то некор нин вӧрас эг петавлы.

— Сӧдз инӧ, рыжикла да чӧдла мӧдӧдчин?— кызкӧ аслысногӧн шуис Алексей.— Сӧдз, сӧдз, шуан... Но-но... Воськыда кӧ шуны, ме эг чайтлы, мый тэ татшӧм кадӧ вӧрӧ мӧдӧдчин.

— Эн чытлы! А мый тані дивёыс? А мыйла эськө, тэ думысь, оз позь меным өтчыд чөдла ветлыны?— скөрысь юалис Прокопий. Пелысыс сы кийн пыдөдз вөйліс ваас да кыпавліс вылөдз, резіс пыжсө гырысь ва войтьясөн.

— Эк тэ, Прокопий Прокопьевич!— спокойнөй, но неуна жалитан гөлөсөн шуис Алексей.— Видзөдлы, Прокопьевич, гөгөрбок. Луныс өд кутшөм! Кос, шонид, кыз шуласны, вый пыр кисьтөма поводдясө. Татшөм луннас и страдуйтны — ытшкыны, куртны, чөвтны. Төдан өд ачыл, кык недель өні помся зэрис. График серти кутшөма колим. А өд кадыс абу водз, ар нин матын. Сю воө, ковмас регыд вундыны петны. Весиг пөрысь бабаяс ставныс видз вылө петісны, а тэ, колхозлөн, кыз шуласны, ветеран, век честнөя, бура уджавлін, а талун со дезертируйтан...

— Но-но!— югнитіс синъяснас Прокопий да ещө ёнджыка гөрдөдіс.— Тэ, вокө, төд, кутшөм кывъясөн шыбласян! Менө дезертирөн шуны! Да ме... Тэ смотри!

— А мыйөн нө тэнө шуны, Прокопьевич?— гажтөма вочавидзис Алексей.— Сідзи и ковмас шуны... Но ладнө, ог кутөй вензыны. Тэ абу нин ичөт морт.

Недыр чөв олісны. Прокопьевич мөвпаліс, мый Алексей, көть и томджык сыысь, но шуис веськыда. Көть сійө нимтіс пөрысь мортөс сэтшөм мисьтөм кывйөн, но лөгасьны сы вылө, пөжалуй, оз позь, сы вөсна мый Прокопий ачыс мыжа. Но мый лоны лои, а тшакла мөдөдчөма да ветлас нин. А век жө абу лөсьыд, мый тадзи артмис. Со сійө, кыз шуис Алексей, колхозса пөрысь ветеран, а страдна лунө мөдөдчис тшакла!

Алексей перйис зепсыс «Беломор» пачка да мыччис Прокопьевичлы папирос.

— Куритчы, Прокопьевич, дугдыв сыннытө. Тшакыд өд некытчө оз пышйы...

Өзтісны папироскаяс, дыркодь чөв олісны. Первой заводитіс нуөдны орлөм сёрнисө Алексей:

— Тэ вот, Прокопьевич, он и вежсы, он пөрысьмы. Ме нин со пөрысьмы, а тэ век на важкоддьд ён.

Прокопьевич шпыньмуніс да шыльөдыштіс уссө.

— Пөрысьмышті жө нин. Коскөй юкалө поводдя вежсьөм водзад. А эбөс абутөм вылө ог на элясь. Ёгор Миколайкөд, матроскөд, төлысь сайын чунь крукөн

кыскасим. Ме на сійӧс кыски. Мися, этатшӧм морт менӧ таркнитас кытчӧкӧ, а ме на вені сійӧс. Отпускысь мунигас кольӧді тшӧтш морттӧ да ёна менам вын вылӧ шензис. Мед оз ло ошйысьӧма, но томдырйид ме вӧвлі, ок, кутшӧм!.. Қольӧма, трустыд, сійӧ кадыс.

— Помнита, Прокопьевич, и ме тэнсьыд воддзадзык кадьяс. Ми, посни челядь, век вӧлі тэ бӧрся вӧтлысям да быдӧн кӧсьям тэ кодь жӧ ёнӧн лоны. А помнитан, кыззи тэ кулак Кузь Вань бӧрся вӧтлысьлін?— серӧктіс Алексей.

— Но-о, кызз нӧ ог помнит, ачым куті да! Ок, и мырсьыштім жӧ ськӧд. Ӧзтіс сійӧ колхозной сёрӧмтӧ дай и усйысис, но эз дзикӧдз. Войяснас век вӧлӧм гортас волывлӧ. Ӧтчыд войын учительница Дарья Ивановна бӧрся кыйӧдчӧма, лыйны вӧлӧм кӧсйӧ, трасичаыд! Но, думайтам, тайӧ кӧинсӧ кыззкӧ колӧ шыркнитны крепыдзык петляӧ, а то уна лектор на вӧчас. Сійӧ жӧ асывнас мӧдӧдчим ми сыкок туй кузя витӧн: Никодим да Васька Роговьяс, лесник Петра, Яким Вань да ме. Дыр лои вӧтчыны, ылӧдз усйысьӧма, верст кызь саяс. Кадыс вӧлі ар, муртса усьыштӧма лым, кок туйыс зэв бура тӧдчӧ. Миянӧс казялӧма, мый вӧтчам, да сувтлытӧг кырсьӧма водзӧ. А ми, дерт, сідз-тадз бергӧдчыны эг кӧсйӧй. Кӧть мед, шуам, сӧ верст ковмас вӧтчыны, а век жӧ суӧдам...

Варовитны радейтысь Прокопьевич вунӧдіс став йывсьыс, шенасис-сынис пелысӧн да дугдывтӧг висьталіс водзӧ:— Первой лым сійӧ луннас и сылі. Кок туй воши. Ми воймим да узьмӧдчим джуджыд коз улын. Пӧрысь коз, пашкыр, дзор, гӧгӧр рой ӧшалӧ. Пестім бипур, нурьясьыштім, пукалам да варовитам. Но, шуам, ӧні миянысь бандит Кузь Вань оз пышйы. Нылын, шуам, кӧнкӧ ми моз жӧ вугралӧ, мыйӧн югдыштас, ми сійӧс узигас тшапнитам.

Ичӧтика ойбыртлім и водзлань мӧдӧдчим. Верстджын мунім. Ме зептӧ киӧс суйи, а табак кӧшельӧй абу. Но, морӧ, шуа, кызз нӧ позьӧ табактӧг. «Ті муной,— шуа ёртъяслы,— а ме бергӧдчыла».

Локті бӧр шойччанінса коз пу дінӧ. Кӧшельӧс корси— эз сюр. Кытчӧ нӧ, думайта, лои, кор стӧча помнита, мый куритчи да этатчӧ вуж вылас пуктылі. Сулала, думайта, мыйся нӧ, мися, тайӧ притча: садыюрӧн табак кӧшель вошти. Друг сӧки меным юрпыдӧсӧ

мыйкө зутшнитіс! Да сэтшөм чорыда, мый муыс и вöрыс син водзын бергөдчылісны. Сразу дикми, шавтовтчи, но кок йылысь эг жö усь. Шапкай кыз вöлі, спаситіс.

Видзöдлі, а сәні пу сайсянь мыччысьöма Кузь Вань да мöдысь нин лöсьöдчö менö прикладнас гөститöдны. Ми сійöс корсям вöрысь, а сійö юр выланым, пу йылас, вöлöма! Войбыд сәні вит мужик куйлім да эг и казавлөй! Но ме сәсся сійöс кызди кватиті да лички муас! Кутліс эськө пуртікасьны, да кысь нин менам киö сюрөм бöрын...

Прокопьевич помаліс ассьыс висьталöмсö да пыдісянь ышловзис, а сәсся содтіс:

— Да, сьöкыд вöлі колхоз котыртан воясад. Кулакъяс быд боксянь зілісны конйыштны, а ми ог на вöлі сяммөй сэк öнiямоз уджавны. Войяссö ог вöлі прамöя узылывлы, век думайта, кызди да мый тöлксö да ладсö лöсьöдны. Асланым пельпом вылын, Алексей Иванович, колхозсö кыпöдiм, асланым вирьяйөн шонтiм да быдтiм... А тэ шуан дезертир! Тэ менö вывтi öбидитiн,—добродушнöя помаліс Прокопий дядь.

— Извиняйтча, Прокопьевич,—нюммунис Алексей да мудера видзöдöмөн содтіс:—А думайтлі, мый тэ збыльысь тшакла мöдöдчöмыд татшөм мича луннас. Öнi аддза, мый ме öшибайтча.

— Дерт жö, öшибайтчан! Көнешнö, öшибайтчан!—Прокопьевич синъясын визлаліс дзөбөм нюм, а гөлöсыс вöлі шмонитана.—Ог жö вöч татшөмтор, мый тэ, мый тэ! А водзö мед тэ эн лысьт думыштны, мый ме муни тшакла, ме тэныд наказание пыдди сета задание—нуны менсьым пестерöс да наберушкаöс перевоз пывсянöдз...

Сәсся неуна сувтыштлис сёрнинас да содтіс:

— Збыльысь ну, Иванович, а то йöзсьыс абу лөсьыд. Дивитны кутасны, пöрысь бес Прокö пö тшакла мöдöдчöма. Мед нин тэ öтнад тöдлiн. Тэ водзын извиняйтча, а мукöдъяс мед оз тöдлыны...

Пыж ныр люкачис берегдорса лыаö. Прокопий Прокопьевич чеччыштіс берегö, бөр йөткыштіс пыжсö да паськыд воськовъясөн мöдöдчис кузь турун пövсттi муртса тыдалысь трöпа кузя. Ылын пыр гораджыка кыліс ытшкан машинаяслөн мудзлытөм горыс.

## М А Ш А

**В**адор кузя тэрмасьомён муніс Маша — том ныв, Ёль сиктысь колхозница. Сійö пемыд-лöz шöвк юбкаа, алöй ковтаа. Еджгов юрси вылас еджыд шапочка, быттьö выль усьом лым. Гөг-рöс мича чужöмыс вöлі гөрдöдöма, бандзибъясыс öз-йисны. Вомдорас ворсіс мелі нюм. Чöдлач рöма синъя-сыс радпырысь югъялісны.

Вöлі тулыс, самöй сійö кадыс, кор лымйыс сылöма нин дзикöдз, онялö шоныд, и ставыс ловзьö, кыпöдчö. Бадьяслөн мыччысьöмаöсь ичöтик коръяс. Тöвсяногөн свежöйджык турунвиж рөмөн вежöдöны бужöд вылын сулалысь козъяс. Вежöдö и ачыс васöд муыс. Шоныд төв пöльтö лöзалысь паськыд Эжва вывтi, серöдö юсö шондi водзын югъялысь посни гыасөн. Но тайö став мичлунсö ывла вылыслысь омöля аддзис Маша. Мод-нöй ичöтик туфелькиа кокъясыс сылөн тэрыба восьла-лісны лыа вывтi. Туйыс эз вöв, гөгөр быдмисны кусть-яс, куйлісны съодасьöм керъяс, и найö надзмöдісны Машаöс.

— Аттö, мед көть эськö ог жö сёрмы,— шуис сійö аслыс, öтилатi ыджыд кытшов вöчигөн, да нöшта тэ-рыба мöдöдчис водзö.

Юрас сылөн гыисны долыд мөвпъяс. Маша мөвпа-ліс сійö морт йывсьыс, кодöс вит во нин видзис аслас сьölöмын. Чеччигөн и водигөн, öтнас пукалігөн и ныв-зонкöд гажöдчигөн Маша некор эз вунöдлыв рудов-синъяса век нюмъялысь Юраöс — йöзкöд варов, Ма-

шакөд мелі зонмөс. Отилайн быдмисны, отилаын гажөдчылісны. Рытгорув, вышивайтөм еджыд дөрөма, петас вөлі Юра гудөкөн да кисьтө-ворсө. И медся бура, став сьөлөмсяньыс ворсис сэк, кор том йөз круг шөрө петас Маша да заводитас, шудаа нюмъялігтырйи, йөктыны «русской». Некор налөн эз вөвлы лөгасьлөм, торйөдчылөм. Дыр гуляйтисны тадзи, и көсийоны нин вөлі отлаасьны, но воис Юралы призывайтчан кад. Прөщайтчисны, көсийисисны видзны ас сьөлөманьыс радейтөмнысө, и Юра мунис ылө-ылө. Коли нин сэсянь некымын во, и аддзысьөм кутис кажитчыны мича вөтөн. Юра, көть и мунөмсяньыс коли нин зэв уна кад, век вөлі Маша син водзын.

Талун пажнайтігөн Машаяс ордө пырис почтальон Дарья. Сійө нюмъялігтыр перйис векньыдик кабала-тор да пуктис Машалы водзас. «Йөктышт, нылө, милөйсяньыд молния»,— висьталіс сэсся. Юра вөлі гижөма, мый локтис Сыктывкарө, командировкаө, оти сутки кежлө. Корөма Машаөс карас талунья пароходөн жө, а то аски пө бөр ковмас лэбзыны самолөтөн служитан местаас. И кырымпас — «Юра», сэтшөм мича куим буква.

Маша котөрөн петалис почта вылө юавны пароход йылысь. Сэн висьталісны, вот-вот пө пароход матыстчас пристаньө, воан пөра нин. Миртуй кузя пристаньөдз вөлі вит километр. Медым эськө не сөрмыны пароход вылө, Маша уськөдчис котөрөн веськыда Эжва берег кузя. Сэти йөзыс эз ветлывны, но тадзнас колө вөлі мунны километр куим кымын сөмын.

Тэрыба мунігтыр Маша мөвпалис, кутшөмджык эськө өні Юра. Көнкө, важсьыс шань, мича. Аддзан да он и төд. Сиктса прөстөй зон вөлі, а военнөй училище помалис, өні офицер. Вот кутшөм радлана аддзысьлөм лоө. Кино вылө ветласны, паркө гуляйтны.

Ва вивті ылісянь кыліс тутөстөм шы. Сідзкө пристаньө воис пароход... Сэтчөдз коли километр кымын. Маша кутис котөртны.

Кустьясөн тырөм шор дорті котөртигөн Маша кыліс нора бакөстөм, кыськө зэв матысь. Маша сувтис да паськөдіс кинас сэтөр кустьяс. И сыысь, мый сійө аддзис, ёкнитис сьөлөмыс...

Шор пыдөсын, лыа сор уль сөяс, куйліс ичөтик еджыд кукань. Сійө пыдө вөйөма кокъяснас.

Сьод пятнаа кымос увсыс нораа видзодисны гырысь синьяс. Синьясыс дзик погибо воом морт видзодла саось, корисны отсог, кевмысисны сы йылысь... Машаос аддзём борын кукань бара нориника ымостіс.

«Аттö,— думыштіс Маша,— вот коні колхозлөи вошөм куканьыс. Кыдз өд со төрыт рытсаян корсисны да век на эз аддзыны. Со кытчö и сибдöма, коньөр...»

Маша матыстчис кукань дорö. Сөй пиö вöйисны и аслак кокьясыс. Сійö чегис ньөр да макнитіс кукань лань.

— Но, донаой, чеччы!.. Но!..

Кукань шогпырысь видзодліс Маша вылö да бара ымостіс. Маша тэрыба чегьяліс кыдз росьяс моздортырыс да пуктіс кукань водзö и бөрö. Сэсся кутчысис куканьлы сыліас да кутіс лэптыны.

— Чеччы, зарни, чеччы!

Кукань эз вөрззы. Маша шай-паймунөм синьясöи видзодліс гөгөрбок.

«Мый вöчны? Котöртны?.. Позьö на суны пароход, пуксыны, мунны карö. Вит во өд эгö аддзысьлөй. Но кольны куканьос? Сутки нин куйлö кодзыд сөй пиын да ваын. Рыт нин лоö бара, некод сійос талун оз аддзы. Кулö коньөр».

Маша пөрччис вылыссыс шөвк ковтасö, юбкасö, мед оз няйтөссыны, да заводитіс тэрыба чеглавны кыдзлысь гырысь увьяс. Көть и ичөт, но век на вöлі надеяыс өдйö перйыны куканьос да воөдчыны пароход вылö.

Недыр мысти Машалы юрас воис мөвп: «А котöртны кө пароход дорö да пуксытөдз висьтавыны сибдөм кукань йылысь сиктö кайысьяслы либö складса стөрöжлы? А...»

Но сэк жö уси дум вылас: пароходөн локтысьяс öні удитісны нин кайны берег дінысь, а пристань дорын прöста сулалысь йөзыс уджалан кадö, дерт, некод абу, весиг челядь абуось. Стөрöж Педөр, дерт, кайис гортас, сиктö, да луннад öшинь пырыс видзодлывлөмөн видзö ассыс нейджыд складсö. Прамөй пристань эз вöv. Пароходыс сувтлывліс бужөд дорас. Сідзкө висьтавыны лоö некодлы, и Маша кө эновтас куканьос, сылы няйтас тан код төдас на мый дыра ковмас куйлыны, гашкö, и кувны.

Маша юрын шуксисны мөвпъяс. Кукань лөня куй-  
ліс, вөрзъывтөг, кыз быттьо надейтчис Маша вылө.

— Коньөрөй...— шуис Маша кукань вылө ёна жа-  
литөмпырысь видзөдөмөн. Маша заводитіс перйыны  
сылысь кокъяссө, медым эськө сэсся куканьсө кыс-  
кыштны, вештыштны увъяс вылө.

Зэв тэрыба, мыйвынсьыс кукань дорын пессигөн  
Маша кывзис пароходлысь свисток, но сійө эз на юргы.

Удайтчис перйыны да нюкыльтны водз кокъясө да  
лэптыштны морөссө. Маша водз кокъяс улас тэрыба  
сюяліс росъяс, медым эськө найө эз вöйны. Та бöрын  
заводитіс перйыны бөр кокъяссө.

Паськөмыс лои сөйөсь. Шорөн визувтіс пөсь. Но  
Маша пиньяссө курччөмөн пессис, мездіс куканьөс,  
өдйөджык, өдйөджык!

Юрөбтіс свисток шы, йөлаыс паськалі Эжва пась-  
та, ылын мөдарас помтөм вöрын. Маша веськөдчис,  
сылөн киясыс лётмунісны... Сідзкө ставыс. Пароход  
вылө эз удит... Регыд кыліс мөд, сэсся коймөд свисток,  
вөсныдык...

Маша видзөдліс кукань вылө. Кутшөм окота вөлі  
аддзөдчывны Юракөд!..

Куканьөс вөлі кыскөма росъяс вылө. Маша кутіс  
отсавны сылы чеччыны.

— Но, чеччы!.. Но!.. Кыпөдчы, дзюлюк!..— шуалис  
сійө да сывтырнас сьөкыда куканьөс лэптіс.

Кукань дырөн, таджъясигтырйи, лэптіс бөр кокъ-  
яссө, сэсся водзсө, сувтіс. Сылөн вөсни кокъясыс тіра-  
лісны, ачыс вөлі сэтшөм коньөриник, слабиник.

— Но вот и сувтім. Ок тэ, сьөд плеш, кутшөма  
дрөжжитан,— меліа шуис Маша да малыштіс ку-  
каньөс.

Ылын, кельыдлөзөн пөртмасын паськыд ю вылын,  
еджыд юсь кодь мыччысис пароход. Сійө матыстчис,  
пыр ыдждіс. Югъялісны рөмпөштан кодь өшиньяс,  
гөрд визя трубаысь пуритіс тшын. Көлесааяс улас ваыс  
пуие, а бөрас валяйтис ыджыд гыясөн.

Маша вөрзөдчывтөг сулаліс да шог синъясөн кол-  
льөдіс мича еджыд пароходсө. А сьөд плешка кукань  
сулаліс сы дорын да нюліс кисө.

## МУДЕР СОСЕД



айцентрса столөвөйын быд пызан вывсянь кылө жаритөм-пражитөм яйлөн сэтшөм чөс-кыд дук, мый быд тшыг морт, тайө дуксө горша апыштөм бөрын, оз нин вермы өткажитчыны кык-куим блюдо ньөбөмысь. А медводдза пызан сайын пукалысьяс — «Югид туй» да «Трактор» колхозья-сысь председателясь Тимофей Данилович да Виктор Миронович со бырөдоны нин нельөд порция пельмень.

— Порсь яйысь чөскыдджык нинөм абу, — висьта-лис «Югид туй» колхозса председатель Тимофей Данилович. — Ме гортын порсь тшөгтө куим чунь кызта вунда, солышта да сідзи и сёя. Ачым со нин дас пудья порсьысь кызджык лои! — председатель шлопөдіс аслыс паськыд морөсас.

— Ме важөн нин казялі, мый быд прамөй колхоз-ын председателыс кыз, — нюмьяліс соседыс. — Тэ вылө кө төдтөм морт видзөдлас, пыр и шуас, — татшөм солиднөй мортыс сөмын вермас лоны передөвөй колхозса председателён.

Тимофей Даниловичлы зэв ёна кажитчисны тайө кывьясыс. Сійө пөтіс нин, чышкыштіс сера чышъян-торйөн вомдорьяссө да заводитіс лабутнөя варовитны. Синьясыс сылөн пөт каньлөн моз куньсисны, а гөлө-сыс нин дзик небыд, бархатнөй.

— Ог ошйысьөм кузя шу, а ме ничево көзяита. «Югид туй» колхозтө аслам мыш вылын лэпти. Талун вот кутасны райком бюро вылад видлавны, коднымөс

ми панйим. Надейтча — ӧтсӧгласӧн шуасны, мый «Югьд туй» водзынджык «Трактор» колхозсьыд, дона Виктор Миронович, тэ кӧть и тожӧ абу омӧль председатель, — Тимофей Данилович нюмъялиг клопӧдис ӧртсӧ пельпомӧдыс.

— Мыйӧн панйин? — сідзжӧ нюмъялигтыр юалис Виктор Миронович.

— Кӧть порсьясӧн, шуам. Сы мында ми видзам ӧні тайӧ руксысь скӧтинасӧ: быд картаын рук-рук, пырнытӧ он лысьт, гачтӧ косявласны. Сӧ гектар му вылӧ ми порсь яйтӧ босьтім 15 центнерӧн!

— Сы мында? — шензьӧмсӧ петкӧдлӧмӧн довкнитис юрнас мӧдыс, но синъясыс сылӧн сералисны.

— Ешӧ на унджык эськӧ вермим видзны да шуи: тырмас. Миян серти тырмас. Колӧ ӧд и деньга нажӧвитны! Вузали сӧ-мӧд порсьпи. Уна деньга чукӧрті. Артав — сӧ шайтӧн порсьпи, кызь тысяча шайт!

— Колӧма тай тэ дінӧ ньӧбасыны волены.

— Ньӧбасисны ӧд тиян нывбабаясыд, ӧна ньӧбасисны. Пикӧ волі. Ӧтарӧ локтӧны. «Вай да вай порсьпитӧ, Тимофей Данилович». Мый нӧ, мися, тиянлы асланыд председательныд оз вузавлы али мый? Оз пӧ, миян пӧ порсьяснад делӧяс омӧльӧсь, оз тырмыны. Но ме бур сӧлӧма морт, вузавлі и налы. Миянлы, мися, ӧткодь, кысянь барыш босьтны. Карсаяслы ӧна сеталі и... Но мый нӧ ме век ас йывсьым висьтала. Вай и тэ юӧрт, кызди тиян делӧяс?

— Миян абу жӧ омӧль, — вочавидзис «Трактор» колхозса председатель. — Быд 100 гектар му вылӧ босьтім порсь яйтӧ ветымын центнерӧн.

— Ветымын центнерӧн? Ми дас витӧн, а ті ветымынӧн? — «Югьд туй» колхозса председательлӧн чуймӧмысла паськалісны синъясыс. — Кысь ті та мында порсьясыслы кӧрымсӧ судзӧдінныд?

— Порсь кӧрымтӧ ӧд ньӧбны оз ков. Чошӧлӧн меню быдӧнлы тӧдса: силос, жуг, картупель, нянь, обрат, турун. Тайӧ сӧянтӧ мыйта колӧ позьӧ заптыны.

— А кысь нӧ ті та мында порсь стадасӧ лӧсьӧдінныд?

— Ми ті моз эгӧ тӧргуйтӧй порсьпияннад, дона Тимофей Данилович, а быдтім найӧс. Воӧн ӧти порсьыс тӧдан мыйта быдтас сетӧ? Ӧти авья порсь миян вайис дас ӧти энъ порсьпи и найӧ ешӧ рӧдитисны

сё сизимдас өти порсьпи. Тадзикөн во чөжөн өти порсь-  
быдтаслысь вөлі босьтөма пөшти вит тонна да джын  
яй! А вуджөд сійөс деньга вылө! Миллионерө нин кутім  
воны, и медсясө, чошөяс вөсна.

— Оні ме гөгөрвоа, мыйла ті порсьпиянтө энө  
вузавлө,— зумыша нурбыльтіс «Югид туй» колхоз-  
са председатель.

— Ми не сөмын эгө төргуйтөй, но и ньөбалім на-  
йөс. Гашкө, миян нывбабаяс сійөн и босьталісны тіян-  
лысь порсьпиянтө?— серөктіс Виктор Мионович.—  
Ме кывлі, мый найө «Югид туйысь» вөлөм ньөбөны  
да миян «Трактор» колхозө бөр вузалөны.

— Аслам киөн ме сідзкө отсалі тіянлы ачымөс  
пайыны!— букыштчис Тимофей Данилович.— Но, му-  
дер сосед, тэ менө көмөдін!

— Эн лөгась,— нюмьяліс соседыс.— Водзөвылө ве-  
лалан!

## КОДИ ВӨЛІ МАШИНААС?



ыри ме колхоз правлениеө. Пызан сайын сөмын председатель Туисов пукало да телефон пыр варовитө.

— Бюро вылын отчёт?.. Мый йылысь нө?.. А-а, скөтнөй дворъяс йылысь! Позьө отчитайтчыны. Миян картаяс — горничаяс кодьось! — стенъясас көть рөмпöштанъяс öшлы. Ремонт лючки-ладнө вөчим, дзим дзурк, медбөръя көрт тувсө вежон сайын тувъялим. Дзоньось лоины картаяс, ном весиг пытшкас пырны оз вермы... Шоньдось, шоньдось, көть майка кежысь котрав!

— Мый нө сөран, Педөр! — эг вермы терпитны да шыаси ме. — Картаяс пырид төлыс шутъялө, зэрыс швачкө, мөсьясид тирзьöны. Абу өмөй яндзим ылöдлыны начальствосө!

Педөр шпыньмуні, суйис чуньяссө аслас рыжөй юрсиас, сувтөдіс ме вылө яндысьтөм синьяссө да шуис:

— Енмьд — вылын, начальствоыд — ылын, Ивановна... Мед сөмын отчитайтчыны-а, бөрас кьдзкө-мыйкө тупкалам розьяссө. Оз, гашкө, дзикөдз йизыны мөсьясид. Локтан во ремонтируйтам, капиталнөя!

— Кольөм во тадзи жө ошйысьлін! Оз тай татчө некод волы ьджьдъяссьыс! Кутшөмкө томиник инструктор Федюкин довъялө да мый сыысь төлкыс?

— Первой секретарь Орлов, чайтан, миян кулига-ад локтас? — серөктіс Туисов. — Оз сійө эшты, сылөн гырысьджык делөяс эмось.

Зэв ёна ме дözми да петі. Збыльысь öд, терпитмөн тайö. Педөр мунас бюро вылö да бара пörъявлас бур йöзсö. Абу öд нин первойысь! А картаяс пытшянь став вöльной светыс тыдалö, а öнi öд сёр ар нин. Кысь сэсся уна йöлыд! Мат жö нин миянлы, дояркаяслы!

Стадасьыс öти мöс вöли кольччöма да сийöс корсьны мöдöдчи. Муна да мөвпала, колö эськö, мися, аслым ветлыны бюро вылас: петкöдлi эськö и Педөрлы и Орловлы пуж! Öтиыслы—скöt вöсна тöждысьтöмысь да пörъясьöмысь, мöдыслы—сылы эскöмысь. Эг эськö видзöдлы, мый сийö первой секретарь.

Арся тöлыс швичкö, кымөръяс быттьö ошкысь повзём ыжъяс пышйöны öта-мöдсö талаялiгтырйи. Кыдзьяс вывсянь виж коръяс гылалöны. Гажтöм арся ывлаыс, и думъяс менам шогöсь. Мый мися вöчны? Райкомö кö мунан, мöсьясöс кодлы колян? А ветлынысö, думайта, быть колö. Сы вылö и райком, медым Педөрöс велöдыштны, тöлк сылы рыжöй юрас суйны.

Довга няйт туйтi, гöпъяссö кытшлала, косджык местаяс корся. Мышсянь машина тутöстiс. Эг кеж, лэптi киöс, «гөлөсуйта», оз-ö нуыштны. Машинаыс кельыдлöз, легкөвöй. Пуксьöдiсны. Сэни шофёр да кутшöмкö, тыдалö, начальник—öчкиа, кучик пальтоа, картуза. Арлыд сертиыс мекöд тшötшъя, а варов. Пыр и шыасис. Ним-овöс тöдмалiс.

— Кутшöма,—юалiс,—овланныд, Катерина Ивановна?

— Омöля,—шуа,—бур мортöй. Вунöдiс миянöс Орлов ёрт, первой секретарным.

Начальник зэв збыльысь видзöдлiс ме вылö. А синъясыс сылөн тöлкаöсь дай напаръя моз пытшкад пырöны.

— Но,—чуймис,—эз жö öд дзикöдз вунöд?

— Вунöдiс,—шуа,—чужöмсö сылысь эгö на адзылöй, кöть кывсьö, воджын сайö нин секретаралö. Миян Педөр сöмын сыысь и полö, мукöд начальствоыд сылы веськодь. А Орлов оз волы. Мед кöть часджын кежлö пыралiс, ми эськö сылы ставсö висьталiм. Бюрократ сийö, а абу мөрт. Позьö жö волыны öтчыдтö, Педөрöс чырыштны.

Нюмдiс начальныкыд, и став стрöглуныс сылөн воши.

— Орлов — прамой мужик, проста тэ видчан. Ме сійос тода, отлаын чай юльвлам. Волас Орлов и тјан дїно. Ме висьтала сылы. А Педортө оз омой совеща- ниеяс вылас чиршодлы? Сэтчө од Педорыд, буракө, частө волывлө.

— Сөрө Педорыд совещаниеяс вылад! Яндзимыс абу! Вот кывзы...

И висьталі ме асланым картаяс йылысь. Ставсө висьталі. Машинасө сувтөдіс да зэв дыр кывзіс.

— Висьтала,— шуис,— тайос райкомын ставсө. Примитам мераяс!

Зумыша шуис, стрөга, а менам сьолөм вылын пыр и личалис. Кылі — дойдісны сійос менам кывъясь. Висьталам вөлі татшөмтортө инструктор Федюкинлы, пасйыштас мыйкө блокнотас, а ачыс шешъялө, быттө сылы шоколад сетісны либө медаль. Төдчө, мый сылы веськодь миян шог-гөрейд и мөвпалө сійө оз тэнад тшыг мөсьяс да пож кодь вевта карта йылысь, а нывъ-ясөн башкаыс тырөма. А тайө ёртыс — дзик мөднога. Гөгөрвоан, мый прамой, сьокыд дума морт. Дыр на мөвпалі, коді, мися, сійө вөлі машинаас? Эг од и юав!

Мөд луннас Педөр локтөма районысь. Зэв пө шог, юрсө өшөдөма. Оз пө нин шпыннав, а отарө ёрччө. Кывсис, чорыда пө накажитөмаось. А рытнас йөзсө кутісны чукөртны собрание вылө.

Муні ме клубө. Тырыс нин йөз. Корси синъясөн председательс, пукалө медводдза скамья вылас. Збы- лысь, рыжөй юрсө лэдзөма. Но, мися, сідзи тэныд и колө.

Восьтісны собрание, и пызан сайө кайис төрытья мортыд, кодкөд машинаад варовиті. Чуйми ме. И сійө менө аддзис, нюмъялө.

— Коді нө тайө, коді? — юася ме гусьоникөн.

— Райкомса первой секретарь Орлов.

Вот тэныд и на! Аттө ерөмакань! Ёна-ө бара, ду- майта, лөгалө ме вылө?

Абу од лөгасьөма! Речь висьталіс да и менө казь- тыштіс, кызди ми ськөд автомашинаад варовитім. Пасибө весиг висьталіс критикаысь. Бур пө, мый Ива- новна синмөс восьтіс. Эски пө вывті ёна очки зыр- тысь... али кызд нин шуис?.. очковтиратель Педөр Туи- совлы да инструктор Федюкинлы. Учтита пө өшибкаос. Ог нин тјанос вунөд, шуө.

Собрание бөрас бабаяс менө ошкисны да сералисны. Көть пө тэ и молодец, а өдвакө картаясуд бурмасны.

Но ме эг сетчы. Юрөс, мися, сета керыштны, оз кө бурмыны! Орлов, шуа, сійө Орлов, абу миян Туисовыд, оз ылөд. Көть заклад вартамөй!

Заклад вартны некыдз эз сөгласитчыны, а жаль, ме эськө вои. Ыджыд строительнөй бригада котыртисны да сэтшөм югыд да шоныд картаяс кыпөдисны, көть збылысь рөмпөштанъяс өшлы, кызди Педөрыд шулис. Бур картаяс, ме дөвөльнөй.

Волөй колөкө, он-ө кө эскөй!

## ГУСЬОН РАДЕЙТЫСЬ



Комсомольскöй организацияса секретарь Коля Дубин пырис кабинетö да кыв шутöг чургöдис Рита Кольцовалы бумага лист. Сэтчö вöли машинка вылын печатайтöма, мый аски лоö комсомольскöй воскресник, локны быть ставлы да, кодi оз лок, сийöс лоö «кыскöма кывкутöмö». Быд комсомолецлы да комсомолкалы колö вöли кырымасьны тайö стрöг бумага вылас.

Рита друг скöрмис, гöрдöдис да ёся видзöдлис Дубин вылö:

— Эх тэ, комсорг, канцелярскöй лов! Он öмöй тэ вермы морт ногөн кывнад висьтавны, мый лоö воскресник. И мый тэ кывкутöмнад повзьöдлан? Вот босьта дай ог лок, и ставыс!

Рита виччысис, мый комсорг лыддяс сылы казеннöй кывъясөн мораль, кызди радейтлис вöчны, но Коля сöмын рама шуис джоджö видзöдиг:

— Парторг тай нö тадз жö юöртавлö...

— А тэ ещö абу на парторг, а комсорг, абу дзор дядьö, а детинка!— вундис Рита.— Бюрократ тэнад парторгыд, дай тэ тшöтш бюрократ, сы вылысь велöдчан!

— Лок, пöжалуйста, Рита,— нора корис Дубин.

Рита чуймис. Мый нö тайö Дубиныс татшöм нор? Оз тадзи комсорг варовитлыв. Дай мыйлакö гöрдöдис, дзик морковь рöма лои. Но Кольцова эз кут дыр мөвпавны да ещö öтчид вундис:

— Ог лок, нарошнӧ ог лок. Велалан, кыдзи колӧ том йӧзкӧд сӧрнитны!

Дубин шӧйӧвошӧмӧн бергӧдчис да юрсӧ ӧшӧдӧмӧн мунис. Рита видзӧдліс сылӧн руд костюм вылӧ, векныдик сылі да петуклӧн кодъ чурвидзысь юрси вылӧ, и нывлӧн сьӧлӧмын вӧрзыштис весиг жалълун том морт дінӧ, коді петіс сы дінысь мыйлакӧ дзик коньӧр кодӧн, но сійӧ клопнитис кияснас да вежняситыр сьылыштис:

— Нарошнӧ ог лок, ог лок, мед бюрократлы лӧӧ шог!

Недыр мысти сійӧ чӧвтліс синъяссӧ аслас дзирдалысь часі вылӧ. Куим минута мысти куим час. Рита тӧрыба идраліс шкапӧ бумагаяс, суйис пызан йӧрӧ ручка да, некодлы кыв шутӧг, петіс кабинетысь. Талун субӧта. Сідзкӧ позяс пӧттӧдз гуляйтны паркын, аски дас часӧдз узыны, лунтыр лыддысьны, а ритнас ветлыны театрӧ премьерыа вылӧ. Кутшӧм нимкодъ петны учреждениеысь субӧта рытӧ!

Крут пос кузя улыс этажӧ котӧрӧн лӧччӧм бӧрын сійӧ пырис раздевалкаӧ, босьтис ассыс лӧз пальтосӧ да тӧрыба суйис кисӧ соскас. Чуньясыс веськалісны кутшӧмкӧ бумагаӧ. Чуймӧм Рита перйис сійӧс да шензяна синъясӧн лыддис:

«Дона Рита, тэныд да меным грӧзитӧ опасность. Ставсӧ висьтала аски воскресник вылын. Тэно радейтысь Н.»

Рита ещӧ ӧтчыл лыддис, бергӧдліс бумагасӧ да бара лыддис. Сійӧ немтор эз гӧгӧрво. Кутшӧм опасность? И коді тайӧ «Н»-ыс? Збыльысь кӧ сӧрнитны, Риталӧн эз вӧв сійӧс «радейтысь» зонмыс. Тайӧ кӧ шутка, то вывті нин лӧсявтӧм шутка. Кутшӧм жӧ опасность сылы вермас грӧзитны?

Рытивбыд Рита мӧвпаліс записка йылысь. Сылы весиг эз ло окота мунны паркӧ. Босьтліс кияс книга, но лыддыны эз вермы, син водзас пыр вӧлі ӧнтая запискаыс. Кутшӧм опасность сійӧс виччысьӧ? Уволитӧм? Но учреждениеын сыӧн вӧліны дӧвӧленӧсь. Счетной удж Рита тӧдіс бура, старайтчис. Главной бухгалтер некор на эз чиршӧдлыв, кыдзи ӧткымынъяссӧ. Штатъяс чинтӧм йылысь нинӧм на жӧ эз кывсы.

Гашкӧ, комсомольскӧй линия кузя мыйкӧ грӧзитӧ? Рита думайтис, думайтис да лӧптыштліс пельпомъяссӧ.

Гажтöма пунктöма уджсö комсомольскöй организация-ын, абу интереснöй сэнi, сы вöсна Рита оз ветлывлы весиг собраниеяс вылö. Кызди заводитас секретарь Коля Дубин собрание вылын речь сяркöдны, öдва верман помсö виччысьны. Дзöнь час ораторствуйтас, да сэтшöм кывъясөн, кызди «этика», «диалектика», «за-лог» да «итог». Сылөн быд доклад дырйи нывъяс лыддьöны, кымынысь Дубин шуас «öчереднöй мог», да волöны ветымынöдз либö квайтымынöдз. Коркö öтчюд Дубин дзöнь татшöм речь висьталiс Риталөн пассивность йылысь.

Бара öмöй Дубин лöсьöдчö сийöс критикуйтны? Гашкö персональнö вопрос сувтöдас сы йылысь?

Рита гораа ышловзис. Сидзкö, аски быть ковмас ветлыны воскресник вылö, кöть и эз вöv окота. Дерт, вöли интереснö, мый висьталас «радейтысь Н».

Рита бöрийöдлiс да лыддьöдлiс учреждениеса став том, гöтыртöм уджалысьясöс. «Н» вылö заводитчана фамилияöсь вöлины сöмын кыкөн — шофёр да управляющöйлөн заместитель. Шофёрыс налөн вöли кöть и том на, но пьяник. Рита мövпыштіс, мый öдвакö шофёр, вина бутылкаөн кызди, мыйöнкö мöдторйөн интересуйтчö. А вот управляющöйлөн заместитель неважөн коли гöтыртөг. Кызди сёрнитiсны учреждениеын, гöтырыс сылөн пышйöма мужикыслөн сьökыд характер вöсна. Код тöдас, гашкö сийö и кыйкъялö том нывъяс бöрся да гижис татшöм запискасö, медым кызкö на дiнö сибöдчыны.

Войнас Рита вöтасис, мый управляющöйлөн заместительыс коралö сийöс. Кор Рита öткажитчис сы сайö мунны, заместитель кутiс горзыны:

«Опаснö тэн ыргъянитны! Ме тэнö уволита удж вылысь».

Рита горöдiс да бöрддзис, и аслас горöдöмö садьмис.

Воскресник вылын вöли гажа. Рита кöрт зырийөн лэпталiс позтыргъяс, сылөн пöдругаясыс öктiсны картупельсö пу ящикъясö, сералiсны, дурисны. Кольцова частöкодъ видзöдлывлiс управляющöйлөн заместитель вылö, кодi öктысис-копрасис неылын, но сылань сийö весиг ньöтчыдысь эз и бергавлыв. Шофёр кыскалiс мешöкъяс да быдöнкöд шмонитiс, но Рита дiнö некутшöм торъя интерес эз петкöдлы.

Картапель керсис. Нывъяс пуксялісны шойччыны да кутісны виччысьны шофёрс, медым регыдджык мунны гортö. Рита думнас скöраліс, видіс записка гижысьöс йöй шуткаысь да көритіс асьсö, мыйла сійö тöрыт и талун дзик прöста волнуйтчис. Сійö пуксис бокöджык картапель тыра мешök вылö.

Гажтöмчысь ныв дінö локтіс секретарь Дубин да виччысьтöм мелі гөлөсөн юаліс:

— Мудзин, Рита?

— Мый көть и мудзи,— ёся вочавидзис сійö.— Оз позь али мый?

— Ме чайті, мый тэ он лок воскресник вылö.

— Весьшөрö чайтöмыд. Тайö ловья удж, а прамöй уджысь ме некор ог пышъяв. Тайö абу тэнад собрание-ыд либö политзанятиеыд.

— А мый?— шöйöвоши Дубин.— Ме старайтча собраниеяс да занятиеяс нуöдны сідзи, медым кыпöдны тиянлысь политической уровень.

— А миянлы колö не сöмын уровень, но и неуна... интерес, гаж. Ми öд абу старукаяс, и тэ абу... Тэ борган лыддян аслад тетрадысь, а ми вугралам. Бесчувственной, кын морт тэ, а ещö йöзöс критикуйтан.

Дубин гөрдöдіс да лэдзис синъяссö муас.

— Абу ме бесчувственной... Менам тожö эм чувство, Риточка,— шуис сійö мытшасьлігтыр.

«Риточка, вот кызди!»

Рита друг гөгөрвоис, коді вөлөм запискалөн авторыс. Сійö шензьöмөн видзöдіс Дубин вылö. Со коді вөлөма «Н»-ыс! Николай Дубин.

— Мый нö лоис, Коля?— надзöник, пöшти вашкөдан гөлөсөн юаліс Рита.

— Ме чайті, мый тэ верман не локны воскресник вылö. Эн кө лок, ковмис эськө меным тэнö... Но, бара критикуйтны, кызди секретарлы, а ме сэссия ог вермы... Жаль тэ меным! Со и гижы, мед локтан...— Дубин виньдалігтыр шуис тайöс, мыжа морт моз видзöдліс ныв вылö да öдйөнджык вештіс сы вылысь синсö.

Рита серöктіс, көсийс шуны: «Чудилö, и тані тэ эн вермы, медым не повзьöдны», но сылы лои мыйыськө яндзим да ачыс гөрдöдіс Дубинысь ёнджыка. Дубин крута бергөдчис да тэрыба муніс йөз дінö. Шöйöвошöм Рита, синсö вештывтөг, дыр на видзöдіс сы вылö.

## ПОРСЬЯС ДА ПРЕДСЕДАТЕЛЬ



«Дружба» колхозса председатель Аполлон Кузиков биысь моз полö выльторъясысь. Öтчыд локтіс сы дінö бригадир Сеня Габов да шуис:

— Аполлон, тан газетас гижöны, йöзыс пö таво раздельнöя няньсö кутасны идравны, ыджыд пöльза пö сетö. Ми, дерт, тшöтш видлам тайöс. А, Аполлон?

— Нөрöвитлам, — буркнитіс Аполлон. — Менам аслам юрöй сур лагун ыжда, йöз төлкөн нэм эг овлы да и ог көсйы. Раздельнöя босьтчан идравны, а оз көартмы? Э, вокö, ме ог көсйы, медым менö ачымöс сэсса пыркöдісны.

Öшибитчис Аполлон. Друг кыськö чукөрөн воисны машинаяс и механизаторъяс куим лунөн идралісны став идсö. Аполлон первойсö оз вöлі сет йöзöс муяс гөгөр писькөдны туй лафетнöй жаткаяслы. Но Аполлонс сэтшöма топöдісны, мый сійö пыр жö «исправитчис».

Тайö жö лунъясö председатель дорö пырис порсь видзысь Öкулина Оверина да павкнитіс Аполлонлөн пызан пасьта газетнöй лист.

— Со, порсьяссö бур йöзыс кызди вердöны, веськыда муяс вылын! — Öкулина тувкнитіс кыз чуньяснас снимок вылö. — Рушку польдчытöдзыс, көнкö, ватшкасны. А ми бруль ва сетам. Тэнö эськö, Аполлон, асьтö бруль ванас тшөгöдышты!

Аполлон пузис, но сувтіс да лабутнöя вочавидзис:

— Ме, кызди председатель, рабочёй кадё менё оскорбитомысь верма тэнё судё сетны, но пока прёсти-та. А порсьяслы талявны картопель му ме ог сет. Порсь — порсь и эм, өти картопель босьтас, а сизимёс эновтас. Штрафуйтны омөля идралөмысь сійёс некыз. Уставын та йылысь нинөм абу висьталөма. Та вöсна вопроссö лыддя помалөмаөн... Тэ өд, Окулина, ачыл төдан, лэдзисны «Парма» колхозын порсьяссö му вылө, а уна-ө найö өктисны картопельсö.

— Да өд сэни вит гектар вылө вит порсьёс лэдзлө-маёсь. Уна-ө нö найö өктасны?

— Ставыс. Верман мунны! — стрöга помалис пред-седатель да бара суйис нырсö бумагаясö.

Но триньöбтис телефон.

— Кузиванов ёрт, ме надейтча, мый ти порсьястö картопель муяс вылад лэдзлывланнуд. Сидз өд? — юалис райисполкомса председатель.

— Гм-м...

Аполлон думыштис, мый районсянбыд спокой оз кутны сетны, да и өткажитчыны веськыда оз позь.

— Сидз, сидз, Павел Евстигнеевич, лэдзлывлам, йирөдлам! — збоя вочавидзис сійö. Некод жö өд прөве-ритны оз вола-а, мый повнысö.

— Но, сидзкö, öни тиянö корреспондентъяс воасны. Примит бура, — помалис райисполкомса председатель.

— Окулина, газетчикъяс локтöны. Тэ йöрт порсь-ястö Чукля йөрö, кытысь тöрыт мөд бригада карту-пельсö керис. Сэни му помын кык метр мында кольыш-тис кодййтöм. Висьталан корреспондентъяслы, мый тайö мусö ставнас порсьяс лукйисны. Шу, татшöм мичаа миян порсьяс картопель керöны. Хе-хе! Найö өд оз гөгөрвоны. Снимайтасны да бөр мунасны. Огö жö өд на вöсна кутö дзонь картопель му тальöдны!

Окулина нюмьөвтис да кыв шутöг петис. Председа-тельлы эз кажитчы сылөн нюмыс да, медся нин, востер нывбабалөн воча кыв шутöг петöмыс. Аполлон юрысь эз кут петны мөвп, мый Окулина сійёс выдайтас, янö-дас газетчикъяс водзын, а найö — став республика пасьта. Унаысь нин ылөдлывлис Аполлон кодсюрöös, неопытнöй йöзöс; томиник инструкторъясöс, весиг өт-кымын ревизоръясöс и ставыс на прöйдитлис бура. Но öни, код төдас...

Чукля йöрын некод эз вöв. Аполлон видзöдліс ас-  
лас керкалань да чуймис. Сылön усадьбаын тыдалісны  
бокöвöй йöз.

«Мый морыс корреспондентъяслы колö сэтысь?»

Аполлон воис потшöс дорас да муртса гораа эз  
ёрччышт. Усадьба му вылын, кытчö пуктыліс карту-  
пель сылön скöр гöтырыс, сук коръяс пиас мöвкъяліс-  
ны порсьяслön мышкуяс. Бура тöдчис, мый найö и та-  
лун тшыгöсь: зэв зіля гудйысисны небыд муас да гор-  
ша вазöдісны картофельсö. Унджык кустыс вöлі нин  
пöрласьöма, мусö быттьökö гөрöма аслыснога плугйön.  
Аполлон артыштис да гөгөрвоис, мый весиг öні кө пыр  
жö вöтлыны порсьяссö, и то нин джын урожайыс лöö  
найö рушкуын. А мый кольö му вылас час мысти?

Шöйöвошöм председатель дінö матыстчис öти га-  
зетчик да топыда кутліс сылысь кисö.

— Молодеч, председатель!— газетчиклön öчки пы-  
рыс нимкодя югъялісны синъясыс.— Ми первойысь на  
аддзылім, кутшöм зіля порсьяс «керöны» картофельтö.  
Выгöднö тадзи найöс «уджöдны»! Бур, пöлезной сн-  
мокъяс вöчим. Мед быд колхозын ті моз жö кутасны  
вердны порсьяссö.

— Ме зэв ёна радейта передöвöй методъяс,— меліа  
нюмъяліс председатель да корсис синъяснас Öкулина-  
öс, но сійö нарошнö вöлі бергöдчöма мышкөн.— Сідзи  
и пасйöй, мый миян передöвöй методъяс паськалöны  
би моз. Да, да! Ме ог любит чорыд плешка консерва-  
торьястö, передöвöй методъяс миянлы колöны нянь  
моз, сынöд моз. Аддзанныд, порсьясыс син водзад сөв-  
мöны тайö картофель му вылас.

Аполлон скöрысь шамраліс кулакъяссö. Сылы око-  
та вöлі уськөдчыны порсьяс вылö да чужъялігтыр вöт-  
лыны найöс аслас му вылысь. Но öд кутас норасыны  
Öкулина, и ошкана статья пыдди газетаын вермас  
петны... фельетон! Позор лöö!

— Öкулина, эз жö ков тадз вöчны!— бöрдан гө-  
лөсөн шуис сійö порсь видзысьлы, кор корреспондентъ-  
яс мунісны нин.

— Аполлон Игнатъевич, öні тэ аддзылін, кызди  
порсьясыд син водзад сөвмöны картофель му вылын.  
Тадзи öд, буракö, тэ шуин корреспондентъясыдлы?

## МЫЙЫСЬ ОШКИСНЫ АГНИЯӦС



Агния Кузнецова петіс ывлаӧ да мӧдӧдчис школалань, кодлӧн гӧрд вевтыс тыдаліс паськыд кыз пуяс сайын. Сійӧ неважӧн на воис чужан сиктас, и ставыс гортдорсаыс сылы кажитчис сэтшӧм мусаӧн, донаӧн. Вот пӧрысьлаыс пемдӧдӧм керкаяс пӧлӧстчӧм ӧшиньясаӧсь. Тайӧ ӧшиньяссӧ сійӧ ичӧтсяныыс на помнитӧ татшӧмӧн. А тані нин крепыда сулалӧ неважӧн кыпӧдӧм выль керка, и ӧвтыштӧ сэсянь пожӧм яглӧн чӧскыд сир дукӧн. Тӧдтӧм керка, кольӧм во эз на вӧв. А вот и джуджыд пельсыс пу; би моз сотчӧны сы вылын ягӧдьяс. Сійӧ ичӧтдырйиыс частӧ ворліс тайӧ веськыд пу дінас.

Агния кыз быттӧ здорovайтчис и керкаясыскӧд и пельсыскӧд. Сылы вӧлі зэв нимкодъ, лӧсьыд. Гортдорса сикт! Кутшӧма сійӧ гажтӧмчис чужан сикт вӧснаыс! Ещӧ лоӧ нимкодъджык, кор мӧвпыштан, мый колины нин велӧдчан кузь вояс, и сійӧ кутас овны гортын, сиктын.

Вот паныдӧн локтӧ Никодим дядь. Шпынняялӧ тошкас. Мудер, но авъя морт, варов. Кӧні йӧзыс, сэні и Никодим дядь.

— Здорово, здорово,— вочавидзис сійӧ Агниялӧн чолӧмалӧм вылӧ.— Кытчӧ тэрмасын?

— Школаӧ. Регыд челядьӧс кутам велӧдны.

— Сідз, сідз, босьтчы и челядь бердӧ. Ӧти пӧрысьӧс тай велӧдӧмыд нин-а!— сьӧкыд кулакъяснас бо-

кас мыджсьомён Никодим сероктыштіс.— А прамөя тэ тайё Лимон Ивановичсө кырссыштөмыд. Сідзи и колө. Молодеч! Абу повзьөмыд.

— Кодысь?— Агния паськөдіс синъяссө чуймөмысла.— Мый тэ сёрнитан, Никодим дядь?

— Қызди мый? Пельшер йывсьыд тай. Правильнө, шуа, сійөс кырссыштөмыд. Сідзи сылы и колө. Важөн нин колө вөлі, сөмын некодлы. Вот тэ ас мортыд воин, и пыр жө гөгөрвоин, код дінө колө босьтчыны, кодөс, кыз шуасны, по шею да гож водзө. Но, адзысьлам на.

Агния чуймөмысла синсө лапйөдлігтыр видзөдіс ылыстчысь колхозник вылө. Мый тайё дядьыс тані висьталіс? Кодөс сійө кырссыштіс? Мый лои? Некутшөм фельдшеркөд сійө эз на паныдасьыв. Эм тані фельдшер Пантелеймон Иванович, кодөс сьөкыд ним вөснаыс векджык шулісны Лимон Ивановичөн, но Агния тайё Лимоньскөд сёрниө эз на волы, синнас на сійөс эз адзыв. Төдө, мый воысь дырджык нин уджалө сэтшөмтө фельдшер, уджалө омөля, и ставыс. Мый нө лои? И көть мед мый лои, мый сылы сэтчөдз? Агния прамөя и гортсыс на эз петав.

Сійө кежис почталань. Сэні нывъяс быдтор төдөны.

— Нывъяс, фельдшер Лимонөс пө кодкө мыйкө вөчөма, өбөдитөма ли мый ли. Ті онө төдөй?..— юалис сійө, кор больгыны радейтысь нывъяс ланьтыштісны.

Тэрыб рыжөй телефонистка паськөдіс газета лист да тувкнитіс вөсньыд чуньнас өти заметкаө. Агния кутіс лыддыны.

Заметкаын вөлі гижөма фельдшер Пантелеймон Иванович йылысь. Олөма морт нин, лэччысьөм, винаөн сөмын интересуйтчысь фельдшер частө юліс запойөн. Фельдшерскөй пункт өдзөсын дзөнь вежонъясөн өшавліс томан.

И уджалігас сійө частө вөвлі гажаюра. Весиг оз видзөдлы гудыр синъяснас висьысь вылад, сөмын кирган гөлөсөн юалас:

— Висьмин, шуан?— и төдмавтөг, мыйөн жө-висьө мортыс, мый вылө норасьө, вомгорулас мургіс:— Нинөм! Ме тэн сета зелля, несйөдлігкөсті бурдан.

И пуктас вөлі пациентлы кипыдөсас кутшөмкө порошок, сода либө пирамидон, кодысь висьысьлы омөль

оз ло, а бурыс, код тѳдас. Но висысыяс полисны юны фельдшерлысь порошокъяссѳ. «Чѳртыс тѳдѳ, мый тайѳ гудыр синмаыс кодъюрнас сетіс!» Унаѳн ветлывлісны лечитчыны кызь километр сайѳ орчча сиктѳ, кѳні уджаліс ѳчкияса варов ныв.

Быдѳн вѳліны скѳрѳсь пьянник-фельдшер вылѳ, и абу дивѳ, мый кодкѳ и гижис газетаѳ, надейтчѳмѳн, мый и медицинскѳй начальство тѳдмалас Лимон Иванович йылысь да гашкѳ вештас сійѳс тась. Заметка помас кырымпасыс вѳлі «А. Кузнецова».

Вот сідзкѳ мый! Сідзкѳ, Никодим дядь чайтѳ, мый тайѳс гижис Агния!

— Нывъяс, ті он-ѳ тѳдѳ, коді сѳтшѳмыс А. Кузнецоваыс?

— Тѳдам. Быдѳн шуѳны, мый тайѳ тѳ.

— Ме?!

— А вот татчѳ локтѳ ачыс Лимон Ивановичыс. Инас, тыдалѳ, оз ѳшйы, шѳйтѳ. Висътав сылы, мый тѳ абу тѳ.

Паськыда вѳссис ѳдзѳс, и комнатаѳ сѳѳкыда цырис фельдшер. Сійѳс ѳнакодъ шатлѳдліс. ѳні сійѳ эз вѳв воддзакѳдъ рам. Ёсь пома тошкыс дзугсьѳма, лѳѳма корѳсь модаа, синъясыс скѳра югъялісны.

— Коді тані учительницаыс? Татчѳ пырѳма. Тайѳ, гашкѳ, тѳ?— фельдшер сувтѳдіс синъяссѳ Агния вылѳ.— Тайѳс тѳ гижин? Тѳда! Кута норасыны!— фельдшер шеныштіс Агния син водзын чукрѳдлѳм газетнѳй листѳн.— Вѳча ставсѳ, медым тѳнѳ накажитісны!

— Ме эг гиж! Мыйла ті думайтанныд, мый ме? Гашкѳ Анна Кузнецова либѳ Александра. Эм ещѳ миян Кузнецова Антонина, Альбина...

— Ангелина,— содтіс телефонистка,— Алена...

— Аделаида,— нюмъяліг шыасис монтѳр.— А Кузнецов Пашѳлѳн гѳтырыс Анастасия, Семѳнлѳн — Акулина, Борис Кузнецовлѳн — Алевтина...

— Вот аддзан, Пантелеймон Иванович,— шуис Агния,— мыйта сиктын Кузнецоваясыс, нимъясыс кодъяслѳн заводитчѳ «А» вылѳ. Прѳста тѳ ме вылѳ шуан.

— Тѳ гижин! Тѳнад локтѳдз некод тані заметкаяс эз гижлыв. Тѳ воин — заметка петіс. Абу мѳй сідз?

Агния падмис да нинѳм эз вермы вочавидзны та вылѳ. Сійѳ пузис дѳзмѳмысла. Мед думайтѳны, мый

сійо гижис. Оз пов! Правильно од пасіомаось. Колө вөлі критикуйтны! Напрасно сійо ачыс эз гиж газетаас, көть и кывліс нин өттор-мөдтор та йылысь. Гөрдөдөм, скөрмөм Агния өдзөссө клопнитөмөн петіс.

Тайо историяыс помассис өдйө. Мөд лун рытнас телефонистка нюмъяліг юөртіс Агниялы, мый рай-здравотдел вештіс фельдшерөс удж вывсьыс да Лимон Иванович мунө нин. Агниялы окота лои видзөдлыны фельдшер вылө. Лимон Иванович вөлі вөрзёма нин туйө. Сійо пукаліс тарантас шөрын важиник виж пу чемодан вылын да мургис ямщикъяслысь сыланкыв. Некод сійөс эз колльөд, эз вөвны сылөн ни рөдвуж, ни төдсаяс. Довкйөдліс төждысьтөм юрнас, морөс бердас топөдіс кучик сумка, кытысь тыдаліс вина сулеялөн гөрд юрыс. Лимон Иванович весиг эз бергөдчыв, кор быдлаө удитысь Никодим дядь мыйкө горөдіс сылы на прощанье. Тарантас воши керкаяс сайын.

— Кутшөм тайо лекарь!— дивитігмоз ропкыштіс Никодим дядь.— Важөн нин талы колө вөлі шыть шуны, Молодеч, Агния! Аддзан, кутшөм өдйө тэнад заметкаыд мөрччис. Газетаыд сійо — вын! Оні выль пельшарөс ыстасны, гашкө, бурджыкөс. Мунам, ме тэныд мөдтор петкөдла. Ыджыд статья сяркнит!

Агния көть и шуис, мый абу сійо авторыс тайо заметкаыслөн, код вөсна фельдшер Лимонлы лои мунны сиктысь, Никодим дядь эз эскы сылы.

— Некод на тані эз гижлыв. Дерт, тэ тайөс маркөдін. Збой, грамотной, культурной, гижны сямман бура. Тэныд и тышкасьны миян быд омөльторкөд. Лок, пыралам сельпоө. Тайо магазин йывсьыс эськө сяркнитны!

Дзескыдінын зыртчисны уна йөз. Бусось өшиньясыс омөля лэдзисны югыдсө. Няйт джодж, пельөсын тэчөм жугласьөм фанерной ящикъяс, гывкъялысь лөз табак тшын, ньөбасьясыяслөн помасьлытөм сёрни — тайо ставсьыс пыр жө окота вөлі петны ывлаө, арся лөняс.

— Агния Фёдоровна, мый тэныд колө? Милости просим, ньөбась,— кыліс прилавок сайсянь вузасысь Натальялөн вывті нин мелі гөлөсыс.

Йөзыс серөктісны.

— Вот кутшөм мелі лои! Полө газетаө веськавны, медым Лимонкөд тшөтш не лэбзыны.

— А өд өні на сөмын пинясис. Өдйө вежсис!

— Гиж, Агния, кызди сийө гусьон аслас рөдвужыслы медбур төварсө сеталө.

Нывбабаяс кытшовтисны Агнияос, кутисны өтамөдсө торкалөмөн висьтавлыны сылы Наталья йылысь.

— Гиж, Агния Фёдоровна, корам тэнө! Колө и тані ладсө лөсьөдны. Аддзан, кызди Лимон кузяыд лючкиладнө артмис!

— Гөгөрвоана,— Никодим лэптис кисө.— Агния гижас. Сидз өд, Агния?

— Гижа,— чорыда шуис Агния.

## НЕВЕСТА



ын» колхозса бригадир Евстолия Выборова тэрмасигтыр тувчаліс рас пөлөн чукльөд-лысь трөпаөд. Асывнас татчө чумалитчыны ыстыліс сійө Дарья Торлоповаөс. Уджыс, төдөмысь, сылөн эштіс нин, и бригадирлы колө вөлі лыддыны, кымын чумали талун вөчис Дарья, медем пасйыны сылы трудодень.

Вот и воис вундөм сю му вылө... «Порсьын» коль-таяс, сөмын кык чумали дөввидзисны бор дорын. Лун-тырөн сөмын кык чумали?! А көні нө ачыс Дарьяыс? Евстолия видзөдліс гөгөр — шуйгавыв, эрдвывтi дзоль-гысь шорлань, веськыдыв, вижөдысь коръяс кыз пу раслань, но Дарья некөн эз тыдав.

— Дарья-а-а!— горөдіс бригадир.

Қыськө мөдлапөвсянь сөмын шыасис йөла. Қытчө нө, збыльысь, Дарьяыс воши? Гортас кө муніс, сылы колө вөлі прөйдитны му дортіыс, көні бригадаса мукөд уджалысьяс дінын сөмын өні на вөлі ачыс Евстолия. Эз-ө нин мыйкө сыкөд ло?

Евстолия локтіс шор дөрө, сэтөр куслань. Гөрд ягөдыс сярвидзис веж коръяс пөвстын. И друг кузь турун пиысь, кодi кытшаліс сэтөр кустсө, Евстолия адзис чурвидзысь сапөга кокъяс.

Бригадир полігтыр матыстчис сапөгъяс дінө, вич-чысигтыр паськөдіс кустъяссө кинас, сюся видзөдліс, кывзысьыштіс лов шысө дзөбөмөн да кокниа лолыш-тіс — куст пиын куйліс Дарья да чөскыда узис, весиг

неуна ныргорён. Чужо́мыс, кыдзи и век, го́рд, по́шти сәтөр рёма́йс. Вомсө паськөдо́ма, а кыз ныр помас пукало́ ыджыд чирк.

Евстолия нетшыштис Дарья́ос ковта соскөдыс.

— Эй, Дарья́ тыётка! Мый тани́ вочан?

Дарья́ дышника кыпөдчис, очсалыштис да меліа шыасис бригадир дінө:

— Тэ эн дивит, утка. Ойбыртсьо́ма неуна. По́рысь мортыдлы абу дивө. Тэ коркө, Столля́, ме арлыдас воан да, гашкө, ме моз жө кутан быд куст улө нёровтчыны. Қоскөй, э́тати, сәтшө́ма юкало́, лолыштны весиг сьөкыд. Зэрас, тыдалө, талун рытнас, поводдя водзын тадзсө овльвлө...— Евстолия чөв оліс, и Дарья́, юрсө катовтыштө́мөн, видзөдліс сылы синмас.

— Менө өд, Столля́, трудовеньнад талун он жө өбидит, гижан жө йөз мындаыс?— юалис сійө ещө нин меліа.

Евстолия скөрмис. Көсйө́ нин вөлі крапкынышуны медся чорыд кывъяссө, но кутчысис, сәсся кинас индіс «порсьяс» вылө да, кыз мый поэьө спокойнө́я, шуис:

— Қор тайос чумалитан, сэки гижа, мыйта по́лагайтчө. А мөдысь кө тадзи луншө́р-лунө водан, юөрта колхоз правлениеө.

— А, тэ тадзи се́рнитан!— ве́кыштчө́мөн вочавидзис Дарья́, и воши сылөн мелілуныс. Го́лөсыс лои киргана, ёсь.— Мун, юөрт! А Василей ре́гыд воас, письмө́ын нин гижө. Со́мын тэ өдвакө сійөс аддзылан! Ог лэдз сійөс тэко́д өтлаасьны! Видзөдтө, кутшө́м моньпу: трудовеньтө́ оз көсйы пасйыны! Кодлыкө честьө уськөдчө, а аслас э́нькапуыс сылы веськодь! Қор тадзи, Васькатө́ синнад он аддзыв! Вот тадз, невесткапуөй!

Евстолия шөйөвошө́мөн сулаліс, эз төд, мый вочавидзны. Дарья́лөн кывъясыс кучкисны сылы веськыда сьөло́мас. Радейтанторйыс сылөн збыльысь вөлі Вася́ — Дарья́лөн пиыс. Дарья́ быдног зіліс торйө́дны найөс, көсйис өтлаө́дны ассьыс писө колхозса ветеринаршакө́д. Қольө́м во Вася́ воліс армияысь куим вежон кежлө отпускө, и Дарья́ быд рыт вайө́дліс гортас ветеринаршаө́с, а писө өтнассө не́кытчө эз лэдзлы пөтавыны: поліс Вася́лөн Евстолиякө́д аддзысьло́мысь.

Дерт, óta-модсö радейтись том йöзöс аддзöдчылö-мысь кутны старука морт эз жö вермы. Бөръя лунö Вася да Евстолия рытбыд вöліны öтлаынöсь. Сэки Дарьялөн висьмыліс мөскыс, да сійö дзикöдз вунöдліс пи йывсьыс. Ныла-зонма гусьöник мунісны Эжва берег дорö да эз и тöдлыны, кызди коли войыс. Коркыаыс öзтіс алöй рөмөн ылі вөр-васö, Вася да Евстолия сетісны кыв виччысьны óta-мөднысö. Мөд луннас Дарья ёна пиняліс Евстолияöс, а сійö сөмын нюмъяліс пöрысьлөн лөкалөм вылö. Но öні сійö бура гөгөрвоис, мый Дарья вермас вöчны омөльтор — лэдзас сы йылысь кутшөмкө лөж слава либö гижас пиыслы быдсикас небыличаяс.

Дарья сюся видзöдіс нывлөн вежласьысь чужөм вылö, быттьö гөгөрвоис, мый öні думайтö Евстолия.

— Но, ог кутöй зычитны, ас йöз öд,— миритчана гөлөсөн шуис Дарья да нюмъявтіс.— Пельшер коркө меным висьтавліс: тэнад пö, Дарья Ивановна, нервьясыд личалөмаось да сійөн пö и горзысьсö. Сідзи и эм, тыдалö. Но да, та йылысь водзö сёрнитны ог кутöй. Сөмын тэ, Столюш, менö йöзыс моз ёнасö эн нарадит. Кор окота, ачым пета удж вылад, ог кö кут висьны. Ас мортлы он жö кут лөк вöчны, көть коркө и коскөй кутас висьны. Йöзыс кö мыйкө кутасны бызгыны, дорйыштан менö бур кывнад. А трудоденьтö гижышт мыйта абу жаль. А Василей локтас да, колөкө, вердас öти мамтö... Эн гөруйт, төвнас овмөсным öтлаын лоас. Бурөн кö мекөд, утка, Василейыд тэнад лоö...— помаліс Дарья.— А тайö чумалиястö дзик пыр жö тэча, öти здукөн.

Евстолия шога ышловзис да муніс. Сылы вöлі яндзим и шог. Мый вöчан татшөм яндысьтөмыдкөд! Вермас öд суклявны пиыс водзын. А Вася — Столлялөн став олан гажыс. Некор сійö оз вунлы, век быттьö сы син водзын — карöй синъяса, паськыд пельпомъяса, сятшөм авъя! Ёна жö торьялөны пиыс да мамыс! И öні ковмас сылысь, пöрысь ёмаыслысь, дышöдчөмсö бригадаса членъясысь дзевны, дорйыны, гашкө, лишнөй трудоденьяс пасьявны. Срам! А он кö вöч сы ногөн, олөмтö тшыкөдас. А кызд сэсса бригадаса членъяс пөвстын дисциплина лэптыны? Казяласны да ставыс кутасны ыстысьны Дарья вылö, көритны, пинясьны. А мый шуас председатель? Мый и вöчны?

Рытөдзис Евстолия пыр думайтис та йылысь, весиг гусьоник бөрдыштис. И кор сийö бара мөдөдчис примитны Дарьялысь удж, сылы кутис кажитчыны, мый та йылысь, пöжалуй, оз сулав ёна шогсыны. Но, шуам, шойччас Дарья тöлысьнас лишнöй кык-куим лун, коркө сёрмыштас удж вылө петны, а коркө и водзджык гортас мунас висьом вылө ыстысьомөн. Но и мед. Ыджыд-ö урон таысь колхозлы? Сы пыдди сылөн лоö Вася, Васюк, Василий Иванович!

Кор бара воис му вылө, сэни важмозыс сулалисны сийö жö кык чумалиыс. Евстолиялөн шензян синъясыс бара бергөдчисны кустлань. Дарья сулалис куст пытшкын да öктис сэтөр.

— Лок, Столля, чөсмасям,— нюмъялигтыр горөдис сийö.— Ме нин удити чөдла пыравны да öтисайын көсья сэтөр вотыштны.

— А чумалиясыд?— стрöга юалис бригадир.

— А чумалитчынытö кодөскө аски мөдөдлан, Столлюшка.

Евстолия сідзи видзөдліс Дарья вылө, мый сийö весиг шатовтчыліс.

Сэсса крута бергөдчис да лөсьөдчыліс котөртны сиктлань, но тэрыба бөр локтис да сибдөм гөлөсөн шуис:

— Оз, тадзи оз ло! Талун жö собрание вылын ставсö висьтала. Меысь кө он яндысь, бур йөзсыс ковмас яндысьны!

— Висьтав, висьтав, бригадёр!— бокас кияснас пыксьөмөн да юрсö тшапа чатөртөмөн вочавидзис Дарья.— А ме талун жö кута гижны Василейлы письмө... Гижя, мый Евстолюшкаыд тэнад загуляйтчис. Гуляйтö колхозса счетоводкөд, сельпоса председателкөд...

— Мый тэ нинöмабусö сөран?

— Нинöмабусö!— ещö на збоймыштис Дарья.— Эг нин öтчыдысь аддзыв тэнö счетовод дінысь. Рыт-рыт пукаланныд правлениеын.

— Удж кузя быть пукав да варовит...

— Видзөдлам, кутшöма тэнö та бöрын Василей кутас радейтны!

Бөрья кывъяссö Евстолия эз нин кывзы. Сийö, ичөтик кулакъяссö гөрддзалөмөн, тэрыба восьлалис векныдык трөпаөд. Чужöмыс öзйис, лөзов синъясыс збоя

югъялісны. Рытнас талун лоӧ колхознӧй собрание. Евстолия думсьыс бӧрйис медся ёсь кывъяс, кодъясӧн сійӧ кутас став колхозникъяс водзын янӧдны дыш Дарьяӧс. А бӧрас кӧть мед сэсся мый лоӧ!

Сикт дінӧ воигӧн сійӧ тувччаліс нин рӧвнӧя. Сы син водзӧ ӧні сувтіс Васялӧн меліа нюмъялысь чужӧмыс, паськыд пельпомъясыс.

«А мый бара шуас Вася?»— думыштіс сійӧ да го-раа ышловзис, а сэсся шуис аслыс:

— Сьӧлӧмыс кӧ том да вежӧрыс том, пӧрысь морт-лысь сӧрӧмсӧ кывзыны оз кут.

## КЫДЗИ МЕ МУНИ ВЕРӨССАЙӨ



өть ме и нывбаба, веськыда шуа, мый ме абу мича. Мыйла пөръясьны? Чужөмтө он веж, выльөс магазинысь он ньөб, кутшөм удайтчис, сэтшөм и эм. Ичөтдырйи мен мамө висътавліс,— тэнө пө, Ираида, курөг кокаліс, сійөн пө сера лоин. Сельхозтехникумын нин велөдчигөн студентьяс вөлі серавлөны — «научнөя» объясняйтөны — Ира Огурчикова чужөмө пө небеснөй из — метеорит усьөма. А өні сиктса нывбабаяс, кор дөзмасны ме вылө, дэльөдөны мужикөс — тэнад гөтыр рожа вылын пө чөртьяс анькытш вартөмаөсь.

Варовми да ставсө нин висътала, кызди ми ськөд гөтрасим. Ыстисны менө техникум помалөм бөрын Джыдж сиктө агрономөн. Уджө босьтчи зіля, мед оз ошйысьөма ло-а, овны гажтөм вөлі! Миянлы, нывбабаяслы, мый колө? Лунын — удж, рытын — любовь. Рытъя кыасянь асья кыаөдз любовь мед вөлі. Мед хромка либө баян ворсө, мед дінад милөй бергалө, синсө тэ вылысь оз вештыв. А мунан Эжва рөч вылө! Лэбачьяс дзольгөны, төлыс пөлялыштө, тэ кутчысьлан милөйкөд дай ещө чупкөдчан-окасян.

Но менө некод сиктын эз любит. Öти-кө, век вөлі муяс вылын — то яровизация, то культивация, механизация, мөд-кө, прамөйджык зоньяссө мукөд нывьяс вөлі забронируйтөмаөсь. Пондыв сэсся зоньяс дінө матыстчыны!

Отчыд зэв өна гажтөм босьтіс. Сы шөрө водзө ещө письмө воис карысь. Мамө гортө корө. Тырмас пө тэн

муын лукйысьны. Лок пö, аддзам на тэныд карысь чистöй удж. И жöник пö корсям, шляпаа служащöйöс.

Муні колхозса председатель дорö, кори уволитны колхозысь.

— Татшöм бур агрономшаöс огö жö уволитöй!— шуис Изосим Саватьевич.— Кызь тысяча доход кольöм во овощись пöлучитим. Тэ чайтан, тэ кö эн вöв, сійö мянлы сюрис? Тэтöг, чайтан, сійöс мянлы мой виас? Эн и думайт, мый тэнö лэдзам. Огö, огö. Менам кыв стальнöй.

Ме муртса ог бöрддзы. Тян капуста вöсна, думайта, ог жö кут ме личнöй олöмтöг овны. Тані Джыдждад ог жö кут пöрысьмöдчыны! Менам дум вылын абу сöмын öти капуста, а тшöтш и жöник. Капустаыд, дерт, колö, но видлы тэ жөниктöг нэмтö овны!

Но, дерт, та йылысь гораа нинöм ог шу, а нарошнö мöд помка вайöдi:

— Кинояс шоча овлöны Джыдждад.

— Сійö збыль,— эскис председатель.— Ме некымынысь нин критикуйтлi пленумьяс вылын культура отделöс. На вöсна, бесьяс вöсна, мян став том йöзыс сиктысь пышъяласны! Тэ эн думайт, Огурчикова, мый и водзö тадзи лöö. Ме налы, киношникъяслы, пуж петкöдлi!— председатель кыз тай зымнитiс пызанас чугун кодь кулакнас.

— Модельнöй туфлияс сельпоын абуöсь. Нывьяс öмöй вермасны сытöг свет вылас существуйтны?

— Ме свет вылас верма бакилö сапöгөн существуйтны,— шуис председатель,— а нывьяс, дерт, модельнöй кöмкөттöг омöльтчасны. Пасьям,— сійö черкнитiс календарь листö,— талун жö сельпоса председательöс та вöсна юрси паныдыс малыштам. Ставсö вöча тэныд, том специалистлы, мый тшöктан, сöмын эн пышйы. Ещö мый тэн колö?— председатель сюся видзöдлiс мен синмö, быттö мыйкö лыддис сэсь, да нюмдiс.— Том нывлы, дерт, медводз колö удал зон.

Ме кумач моз гöрдöдi да гöрдöдi:

— Колö али оз, ме ачым тöда!

— Сидз, сидз,— нюмьялис председатель.— Гөгөрвоа.

— А ме всё равно муна тась!— скöрысь горöдi, медым дзевны яндзимöс, да петi öдзöс крапкөмөн.

Рытнас петi клубö. Видзöда, выль зон сэни эм. Армияысь локтöма. Тутринов Егор пö тайö, шуöны. Пась-

кыд пельпомъяса, неуна рыжой, быттьо пач вомо юрсо  
ошибкаон суйлома да сэни балябожыс чишкасьома. А  
сідзсо мича, орёл кодь!

Орёл кодь эськө да не меным. Но Тутринов немвич-  
чысьтог локтис ме дінө. Кутшөма пö овлан, Ирочка?

Ме сэни и сылі сись моз. Ирочкаон од некод на  
менө весиг сорсьомөн эз нимтыв.

Сёрни-басни. Ме тшөтш смелмөдчышти, зон выло  
кыйкнитлі, а сьолөмой сідзи и чеччө, быттьо лэчкө  
сюрөм сьола.

Кольөдіс менө Егорка. Мөд рыт — бара. И завод-  
чис мян любовь. Шуисны кө сэк — товарищ Огур-  
чикова, кай өклучень выло да сэсянь увлань юрөн  
чеччышт медся джуджыд колодечас, а то Егоркатө  
мырдям — чеччышти эськө!

Мунөм йылысь ме, дерт, эг нин кут думайтны.  
Кутшөм нин сэн мунөм татшөм любовь дырйи! И сэк  
жө ещө кинотө кутисны пöшти быд рыт петкөдлыны.  
Кывсис, крепыда пö босьтчылөма председатель кинош-  
никъяс бердө. А өтчыд колхозной собрание вылын  
председатель меным торжественной сетис джуджыд  
каблука туфельки.

— Колхоз премируйтө,— шуис,— тэнө бур уджысь,  
Огурчикова ёрт. Тэнад весиг фамилияыд,— шуө,— ма-  
лосольной өгуреч кодь чөскыд. И мед тэнад төжды-  
сьомөн уна өгуреч бөчка лоө колхозной амбарын.

— Төждысьны колө том специалистъяс вөсна,—  
йөзыс дінө шыасис председатель.— Бур агрономъястөг  
да зоотехникъястөг, ёртъяс, водзө чеччыштны сьөкыд.

Мый сэсся меным висьтавыны? Регыд мян свадьба  
лои. Изосим Саватьевич, председателным, ачыс судзө-  
діс меным кыськө мича еджыд платье, коді пöлагайтчө  
невесталы. Пуксим ми сэсся пызан сайө шойччыштны:  
Егорка, ме да председатель. Сійө и тапнитис жөникөс  
пельпомөдыс:

— Молодеч,— шуис,— задание чөстьөн пөртін  
олөмө.

Егорка нюмъялігтыр чуньсө пуктис вомдорас — чөв  
пö ов, председатель.

— Кутшөм задание?— шуа.— Ноко, висьталөй!

Дыр эз висьтавыны, но ме век жө заставиті. Вөлөм-  
кө, Егорлы мекөд төдмасьны председатель тшөктөма.

— А тэ,— шуа,— гашкө и гөтрасин ме вылө председатель тшөктөм серти, а эн любовь ради!— да кыз тай шлөпниті Ёгорлы банбокас!

— Любовь ради,— шуө,— любовь ради! Председатель тшөктыліс мен сөмын тэнө гажөдыштны, мед тэ эн пышйы, а ме эг и төдлы, кызди радейтны куті.

А председатель сералө.

— Ме,— шуө,— гөтрасьны тшөктыны ог имеет право, а гажөдыштны том нылөс, мед сійө эз шогсы, зонлы рекомандуйтны верма. Зонмыс өд ещө абу бокөвөй, а аслам вежа пи. И ме зэв рад, мый ті гөтрасинныд. Ёгорлы сюри авья гөтыр, а колхозлы — төлка агроном.

Мый сэсся та вылө шуан?

## СЬӨЛӨМӨ КЛЮЧ



ытпомын нин ме пыри «Чарла» колхоз правлениео.

Воисны бригадиръяс да кутісны төлкуйтны, кыдзи өдйөджык помавны ытшкөм. Ме төдмаси накөд. Томджыкъяс и олөмаджыкъяс — ставныс багатыр кодь мужичөйяс, гожъялөмаось, зумыдось. Сэсся пырис еджыд чышъяна косіник нывбаба.

— Вот, тайө витөд бригадир. Көть бригадаыс и витөд, а быд уджын первой,— шуис председатель да нюмъөвтис.— Эн видзөд, мый Матрена Егоровна раминик. Сюрлы сылы сөмын.

— Эн повзөдлы мортсө!— шуткаөн жө вочавидзис Матрена Егоровна, и төлка синъясыс сьлөн сюся видзөдлісны ме вылө. Мен пыр жө окота лои варовитыштны татшөм ошкана мортыскөд да пукси ськөд орччөн.

— Висьтав, Матрена Егоровна, кыдзи тэ шедөдін первой местасө?— заводиті ме.— Буракө, быдөн бригадаад зэв зильось. Но өд, көнкө, вөвліны и дышъяс?

— Вөвліны, кыдзи эз вөвліны! Но ме быдөн дінө зіля матыстчыны морт серти, и зільмыштисны нин, зільмыштисны сэтшөмъясыс.

— Өти сэтшөм морт йылысь висьталышт, пөжалуйста.

— Со босьтам көть Порфирийөс. Сиктса ногөн Порө Пирөөн ми сійөс шуам. Батыс сьлөн Порфирий жө, но Порөөн шулөмаось. Важөн поп вөлөм сы вылө

лөгалө, голь мортыд ругатө этша сетө да. Локтас Порөбд питө пыртны, а поп сылы шуас: «Ачыл тэ Порө, картаад порө да мед ещө пиыл лоө Порө». И сылы тшөтш Порфирий ним пуктас.

Попөс ми таысь, дерт, ог ошкөй, а мый характерыс Порфирийлөн порозлөн кодь, ошлөн кодь, сийө збыль. Мудер дай дыш! Оз кө окотит мунны удж вылө, некыз он вермы ыстыны. Ог пө вермы, коскөй юкалө, гөйгөй пө вөрзьөма дай кочөгөй бытшкө. Мукөддырйи шуас — курөгөй пө бокө колькъялө, кыйөдчыны пө колө, либө ыжөй пө нөйтчө, колө межөс корсьлыны. Пирөлы помкаыл век сюрө. Стрөга шуан — ас вылад горөдас. А мыйкө кө неладнө вөчөма — соссяс да өдийөджык дінсьыл мунас.

Отчыл ме дзыкөдз нин дөзмылі. Локті председатель дінө да шуа:

— Откажитча ме Пирөбсь, матайтчи. Черкнитөй сийөс менам списокысь. Мед, колөкө, васаясыс сийөс уджөдөны — плуг доддялөны да Эжва юсө горөны.

— Энлы, — шуө председатель, — өш кодь мортөс огө на сетө васаяслы. Гашкө, кызкө уймитчас.

Варовиті ме Пирөкөд не өтчыдысь. Сөмын оз кывзы сийө, варгыльтас-мунас дінсьыл кыв шутөг. Думайтa, мөдногөн колө сылөн сьөлөм бердө ключсө корсьны.

Таво тулыснас локта ылыс муяс вывсянь. Аддза — заворсө восьсөн кольөмаөсь, ыжъяс пырөмаөсь өзим вылө, травитөны көдзасө. А водзын — ме ачим адзылі, — прөйдитіс Пирө. Дерт, сийө заворсө восьсөн кольөма. Ладнө, думайтa, босьтчыла ме тэ дінө вьльногөн, гашкө, мыйкө артмас.

Вөтөді сийөс да өна видча.

— Порфирий зять, — шуа, — тэ аддзылін, мый вөчөмаөсь! — зятьнас шуөмсө сийө зэв өна радейтө. Мудерджык бабаяс век сийөс зятьөн шуөны, кор көсийны, медым сийө кывзысис.

— Тэ мянн бригадаын, — шуа, — честнөй морт, первой активист. Позоритам вай тэа-меа сийө лөк мортсө, коді мянлысь общественнөй озырлунсө травитө. Кыдзи сылы абу яндзим!

Вида да вида ме завор восьтысьөс быдногыс, быттьө ог төд, коді сідзсө вөчис, а Пирө тшөтш содталө. Мый сылы вөчнысө, быть ме дор сувт! Бура ме и вись-

талі сылы завор восьсөн кольёмысь вредсö. Пирёлөн чужо́мыс кумач кодь гөрд, а ме дор жö шуалö:

— Сідз, сідз, Егоровна, тэ збыль тайö сёрнитан. Омоль морт сійö, коді тадзсö вöчис.

— Төдмав,— шуа,— Порфирий, кызди тэ честной морт, коді мыжаыс, да судö сетам потраваысь. Кульыштасны сылысь тысяча рублей, казялас!

Порфирий көсийысис да тэрмасьомөн муніс. Ме вöтчи ылісянь бөрсяыс, мед менö оз казяв. Кык завор пыр вуджис ещö Пирö зять да кыкнансö зэв бура пöд-лаліс. Мөрччис критикаыд!

Сэксянь частö ме куті варовитны Порфирийкөд. Ошкышта сійöс, мыйкө кө бура вöчыштöма, йöз водзын пример вылö пукта.

— Порфирий талун зэв зіля уджаліс. Передөвик,— шуа йöзыслы муніг-локтігөн.— Босьтöй пример сы вылысь, вöтчöй сы бөрся.

Сылы любö, ещö ёнджыка старайтчö. Зільмис öд мортыд! Быд лун кутіс удж вылö петны. Морт том на, ён, сөмын мыркөдчö. Но öтчыд бара на прöступитчыліс.

Турун пуктан медводдза лунъясö муна видз вылö. Председателькөд сёрнитышти да йöзсьыс неуна кольышти. Тöлыс пöлялыштö, лэбачьяс сьылöны, тыясыс лөзалöны. Гажа! Нöшта нин долыд, мый удж мунö öдйö. Поводьяыс мича, йöз старайтчöны. Колö, думайта, ещö на зільджыка страдуйтны. Зэръяс кө кутасны шливгыны, ставыс торксяс. Татшөм мича поводдяыслөн быд час öні дона.

Туйыс мунö ю дорті. Кышакылöны бадьяс, юыс на вöсна оз тыдав. Друг бадьяс вывті... чери лэбзис, югь-ёвтис эзысьөн да воши. Чери, дерт, öтнас оз лэбав, кодкө сійöс эм лэбөдлысь, вуграсьысь. Матыстчи бадь куст бердö. Мыр вылын мужичöй морт пукалö, вугыр самалö. Кузь съод юрси да рыжöй пинжак сертиыс төді — Пирö.

Сувтис, шеныштчөмөн чөвтис вугыр. Дзöргö-видзөдö, виччысьö черилысь крукасьөм.

Час, мися, ме тэныд крукала ёді. Видз вылö мунысьыд то кытчөдз сөмын и воöма! Перйи нёрөвтчөм сись мыр, гусьöник матыстчи да кыз тай быркнита Пирö юр вывті ваас! Сюръяөн кыпалі ваыс, быттьö бомбаысь гыыс швучкис Пирёлөн көмтөм көкө. Чур-

чер-муні Пирё, шарк бергөдчис. Ме дзевси, видзёда. Яндысис Пирё, гөрдөдіс, рожаыс бара кумач кодь. Сюйыштіс вугыр шатинсё да туиссё куст улё, петіс трёпа вылө, довгө-мунё. Ме вөтча бөрсяыс.

— Порфирий,— шуа,— ме тай тэнё суөді,— меліа сёрнита, быттьё нинём эз и вөвлы.

Чөв олө, юрсё өшөдөма.

— Порфирий зять,— шуа,— талун лоө бригаднөй собрание. Вот тэ выступит.

— Мый йылысь?— нурбыльтіс сійё.

— А вот, порядок йылысь. Янөдышт найёс, кодьяс сёрмөны.

— Ме ог.

— Мыйла он? Тэ бура уджалан...

— Сералан кө-а?— букыша бергөдчис мелань.

— Ог жө серав. Мый тэ?.. Но, көть и вөчлан өшибка, тэ абу омоль морт, Порфирий, ме төда йөзтө. Крестьянин пи, ачюд бур крестьянин. Тэнад ён киясөн төдан мый позьё вөчны! Гөра позьё путкыльтны, не сөмын ытшкыны. Тэ кө босьтчан прамөя, өдвакө кодкө тэ бөрся вермас вөтчыны.

— А мый, чайтан, ог вермы! Төрыт на трудоденьонджынйөн босьті. Ме, чойё, трактор мында вын ас пытшкысь кыла. Муыс кө вугья вөлі, мусё эськө бергөді!— шпыньмуні Порфирий.

Мунам, төлкөн-ладөн сёрнитам. Воим да кызд тай Пирё босьтчис ытшкыны! Қосаыс сөмын чардбиён югь-өвтлө. Медся уна ытшкис.

И өні век передөвик, быдлаын первой морт.

## СЕМЁНЛӨН ШУДТӨМ ЛУН



ельсөветса председатель Семён Қочанов, ар нелямына латшкөс мужичөй, сьөкыда нёровтчис сьөд кучикысь диван вылө да дышника кыскыштіс каллянсө. Обедөдз вөлі ылын на, и Семён Иванович эз төд, кытчө воштыны кадсө. Талун сійө кырымаліс нин вөралысь Сизь Пашлы справка сы йылысь, мый сьлөн, Павел Бугаевлөн, эм пон Лыско, Қатшыслөн да Бусколөн породистөй пи, и сійө аслас көзяиныскөд мөдөдчө пон выставка вылө. Председатель чорыда, өддзөдчөмөн ляскис сьөд печать, и тайөн эштіс сьлөн лунся став уджыс.

Надзөникөн катласис ыджыд стениөй часілөн гиря кодь маятник, и председательлы воис дум вылас,— а лөсьөдны кө маятник улас плештө, кымын кучкөм эськө верман терпитны? Сөөс, пөжалуй, терпитан, а эсся вермас лөз йөг кайны...

Кильчө вылын кылісны кок шыяс. Председатель очсалигтыр чеччис диван вылысь. Абу лөсьыд, йөзыс кө аддзасны, мый сельсөветса председатель луншөр-лунө диван вылын Васька кань моз, куткырвидзө. Дульнас шыльөдыштіс рыжөй юрсисө, коді сулаліс порсь щөть моз, тэрыба пуксис пызан сайө да кос перөнас тувкнитіс бумага листө, кызд быттө Семён Қочанов мыйкө зіля гижө.

Пырисны кыкөн: лөз костюма гөгрөс чужөма нюмъялысь зон да вөсньыдик том ныв. Пырысьяс локтісны председатель дінө да жиасисны ськөд.

— Совминысь инструктор Алексей Мишарин.

— Лидия Пирогова, райгазетаысь корреспондент.

Семён Ивановичлөн ыркмуни пытшкөсыс, быттьö сійö уськөдчис увлань юрөн джуджыд йирö. Но юрас визьнитис мөвп: «Абу öд первойысь, унаөн нин волыв-лисны быдсикас прöверайтысьясыс да некод на тай эз нылышт». Тайö мөвп вöснаыс пыр жö личалис морöсыс, сійö меліа шпыцьмуни.

— Ми локтім тöдмасьны тiян уджөн,— шуис Лидия Пирогова.— Мый вöчö сельскöй сöвет нянь идралöм бура котыртöм могысь?

Алексей Мишарин перйис блокнот, дзирдалысь ручка да лöсьöдчис гижны.

— Э-э, унатор вöчам, унатор,— мөмъялігтыр заводитис Семён Иванович да мөвпаліс: «Мый эськө унджык висьтавны?»— Сессия вöлі, решение примитім, индім, тшöктім, обяжитім, предложитім. Активнöя варовитисны депутатъяс. Медся нин учитель Юдин,— Семён Иванович серöктис, медым тшöтш гажмыштісны стрöг прöверайтысьяс.— Первой Юдиныд бумажка серти час сёрнитис, а сэссия кабаласö шыбитис да ещö кык час варгис. Варовсь, активнöйöсь миян войтырыд, збыль шуа.

— А решениесö кутшöмөс примитінныд?

— Тöлка, зэв бур решение, комын öкмыс пунктысь. Дзонь час лыддим.

— Мыйла нö либö нелямынöд пунктсö энö ещö сүйö?— нюмъялігтыр юалис Мишарин.

Семён Ивановичлы эз кажитчы сылөн аслыснога нюмъялöмыс. «Шпыннялö мерин моз, быттьö зөр сёйöма»— дöзмөмөн мөвпыштіс сійö да öдйöджык содтіс:

— Ми öд огö сöмын гижö, но и олөмө пöртам. Прöверитöй кöть. Вот, шуам, гөлөсуйтім, медым ни öти депутат уджалан кадö эз прöгуливайт, вина эз ю...

— Табак эз курит...— содтіс Мишарин.

— Сэтшöм постановлениеыс эз вöv, табак куритны быдөнлы позьö,— бара öбидитчөмөн вочавидзис Кочанов.— Мый ме, Иван дурак али мый?

— Да öд сідзи гөгөрвоана, мый уджалан кадö депутатлы, дай не сöмын сылы,— некодлы прогуливайтны абу лöсьыд,— тшöтш нюмдіс Пирогова.— Мыйла сы йылысь колö пасйыны да ещö гөлөсуйтны?

— Вай петкөдлы миянлы, кызди сельсовет төждысьө сиктса йөз вөсна?— сувтис Мишарин.— Сөмын эн бумага вылысь, а олөмсьыс. Төдам ми сийө бумага-ястө, асьным гижлывлам!— шмонитис сийө.

Мунисны магазинө. Коддзөм морт моз пөлөстчөм юрпөла керка кильчө динын туплясисны важ ящикъяс. Өдзөсас чурвидзис симөм томан, сэтшөмъяс пиысь, кодъясөс дедъяс өшлывлисны магазеза амбар өдзөсьясө.

— Вузасъысьыслөн растрата пө лоөма,— раминика висьталис Семён Иванович.— Чөвтисны, а выльсө эз на аддзы сельпоса руководствоыд.

— Дыр-ө нин оз уджав магазинныд?

— Оз на дыр, вежон кык,— пөръялис Қочанов. Магазиныс эськө төлысь чөж нин пөдса.— Йөзыс пока ветлөны орчча сиктө ньөбасънысө...

— Сизим километр сайө? Бөра-водза дас нель, уджалігкості? Да-аа...— нюжөдыштіс Мишарин.

Кежисны клубө. Өдзөсын томаныс эз вөв.

— Мый томансьыс, код нө гусялас куим кока скамьяястө да шыр сөйөм важ книгаястө,— шуис дөзмыштөмөн Пирогова.

— Мый нө вөчлывлан, председатель өрт,— тапнитис Қочановлы пельпомас Мишарин да меліа юалис:— Висьтав вай веськыда, сө муса друг!

Тайө меліа юалөмсьыс Қочанов и скөрмис. Мед көть нин видисны!

— Ме производство котырта!— шенасъны кутис сийө кияснас.— Главнойыс — нянь! Клубнад он пөт, няньыд кө оз ло, кынөмыд кутас гуракывны. Төрыт на войшөрөдз вөлі вунданіны!

— Көні вөлін, кутшөм йөрын?— вежливөя юасис Мишарин.

— Жборган йөрө ветлі, со кытчө,— Семён Иванович висьталис ылысджык йөрсө надейтчөмөн, мый сьөкыдджык лоө прөверитны, воліс-ө сийө сэтчө.

— Ветлам Жборган йөрад, нуөд вай. Йөзыскөд воровитыштам, отсыштам, кольтаяс көть йиалыштам,— и Семён Ивановичлы быть лои восьлавны.

«Кывтыдас али катыдас нө Жборган йөрыс?— мөвпалис сийө.— Тайө служитөмөн во кызь кымын эг нин эштыв петавлыны муяс вылө. Весиг өд и юавны гусьоникөн некодлысь ог лысьт, казяласны тайө антусъясыс... О, чөрт!»

Семён Иванович чорыда мөвпалігад эз и тӧдлы, кыдзи сконъяссис жугалӧм тротуарӧ да суніс увлань юрӧн канаваӧ. Ладнӧ кӧть ваыс сәні эз вӧв да звирк чеччыштис кок йылас. Гачкокыс вожасис, но тайӧ нинӧм.

— Самообложениетӧ, кӧнкӧ, быд во ӧктан, а тротуартӧ он ремонтируйт,— видиштіс председательӧс Пирогова.

— А гашкӧ Қочановыс и самообложениесӧ оз чукӧртлыв, мыйӧн тӧдан,— шыасис Мишарин.

Мунісны верст кык кымын куш пӧскӧтина вывтӧ, вуджисны анькытш йӧр вомӧн, прӧйдитісны мудзтӧдзныс тшӧкыд рас пыр. Понӧльяс кватлалісны найӧс паськӧмӧдныс, валежникӧ крукасьлісны кокъясныс.

— Тә эн-ӧ ылав, Қочанов ӧрт?— кызьӧдысь нин юаліс Мишарин.

— Эг жӧ ылав, мый ті!— мыйлакӧ гусьӧникӧн вочавидзис гӧрдӧдӧм Қочанов.

Веж ковӧр кодь нитш вольсаліс кустъяс костсӧ. Пирогова тувчис сәтчӧ и вӧйис коскӧдзис, быттӧ кодкӧ нитш увсянныс дернитіс сійӧс увлань.

— Спаситӧй!— чилӧстіс сійӧ, ылӧдз шыбитіс сумкасӧ да лёкысь шашаритчис тусяпуӧ.

Пӧжалуй, нинӧмла висътавны, кыдзи мужичӧйяс кыскисны сійӧс да сетісны ӧтиыс пинжаксӧ, мӧдыс гачсӧ: Пирогова кӧтасис юрпыдӧсӧдзис. Қолӧ сӧмын лыддысьысыяслы юӧртны, мый тайӧ сельсӧветас председателыс абу нин Семён Қочанов: Жборган йӧрӧ ветлӧм эз ло сылы шудаӧн.

## СПОРТСМЕН ДА МЕЖ



портывнӧй площадка вылын жуисны том йӧз. Ӧтияс чиркъяс моз чеччалісны вывлань, мӧдъяс турияс моз ветлӧдлісны бум кузя. Коймӧдъяс котралісны, а нельӧдъяс... Нельӧдъяс лыдын ме вӧлі ӧтнам, но меным яндзим ас йылысь висьтавыны. Сӧмын на ме пызь мешӧк моз ӧшалі турник вылын, а ӧні колӧ вӧлі чеччыштны кучик «конь» вомӧн. «Коньӧс» ми шулім «кӧбылаӧн», а ме сійӧс нимті нӧшта на мисьтӧмджыка, кызд быттьӧ «конь» вӧлі мыжа менам укшальлунысь.

Ёртъяс важӧн нин чеччыштісны сы вомӧн да эновтісны сійӧс, а ме эг вермы весиг ӧтчыд скокны. Полӧмӧн видзӧді нель пу кок йылын сулалысь, кучикӧн кышӧм тайӧ кер пом вылас да кӧч моз сырми. Полі, тіралі, кокъясӧй кынмисны места вылын, эз нуны менӧ «кӧбыла» дінӧ. Қысь нин сы вомӧн чеччыштны!

Физкультура велӧдысь Михаил Пименов локтіс да жалитыштӧмӧн видзӧдліс ме вылӧ.

— Полан? Ок тэ, кӧч сьӧлӧм! Қыззи тэнӧ збоймӧдны? Тэ скӧрмы, пиньтӧ мурч-курччы да чеччышт!

— Ог лысьт,— муртса эг бӧрддзы ме.

— Лысьт! Ас вылад колӧ надейтчыны! Тэ ӧд ӧні он надейтчы?

— Ог, дерт. Ог вермы да!

— Шу — верма! Но, шу!

— Шуа кӧть эськӧ да, ог жӧ ӧд вермы-а.

Михаил Иванович дыркодъ пессис мекӧд, но чеччыштны эг и лысьт.

Михаил Иванович скөрмис, заводитліс видны, но, бур сьёлёма мортыд, сэсся серөктіс, шеньштіс кинас да нуөдіс менө борйө.

— Кывзы,— шуис сійө,— кывзы, мый ме тэн веськыда висьтала. Ме тэ кодь жө косіник да жебиник вөвлі, быд төв пөльыштөмысь полі. Том йөз футбол гөняйтөдлөны, карйөн ворсөны, котралөны, чеччалөны, лыйсьөны, а ме век книгаяс вылын зуняся...

Ме кывзі и эз эскыссы. Михаил Ивановичлөн гождьялөм мича чужөмыс лөсталіс шонді югөръяс улын. Вөрса пожөм кодь веськыд да ён, сійө кажитчис меным кутшөмкө древнегреческөй герой кодьөн, кодьяскөд ми төдмасим история урокъяс вылын. Геркулес дай сөмын!

— Физкультура урокъяс вылын ме вылын серавлісны,— висьталіс сійө водзө,— турник вылө өшгья колода моз, ог вермы кыпөдчыны, бум кузя мунігөн век уся, чеччышта медся матөдз. Эг эскы аслам вынъясө, чайті, мый всё равно немтор оз артмы, да ог вөлі прамөя и зэлөдчывлы,— медтыкө кызкө сөмын вөчны упражнениесө-а, мед учитель эновтчас ме дінысь. Ёртъяслөн сералөмыс ещө нин ёна падмөдіс менө.

Өтчюд рытын дөзми лыддысьны да петі пальөдчыны. Школабердса спортивнөй площадка вывсянь кылісны том йөзлөн гөлөсьяс. Мөдөдчи сэтчө. Нывзон, школаса спортивнөй кружокысь членъяс, пуксялөмаөсь площадкабердса веж турун вылө да гөлчтөны. Упражняйтчөмаөсь быдсикасногөн, шойччөны.

Пукси на дінө. Найө ставныс трусикаөсь, майкааөсь, ме — костюма, галетука, франт кодь. Друг найө гораа серөктісны да кызд тай ставөн чепөсйисны! Матын вөлі джуджыд да паськыд канава, овраг кодь, няйт пыдөса. Ставныс найө чеччалісны канава мөдар сайө. Коді воис, а коді эз — сунгысис пыдөсас.

Мый нө лои? Видзөда, сэтчө локтө зэв ыджыд сьөд меж, сюръяснас пыркөдө.

Антусөн сійөс шулісны, пөрөдистөй колхознөй межсө. Кузь гөна, паськыд морөса, кыз да чукля сюръяса, синъясыс биа өгыр моз өзйөны — дзик чөрт кодь. Ёна радейтліс сійө мужичөйясөс люкавны. Бур көзьяйкаыс вөсна, тыдалө, бабаясөс оз вөлі вөрзьөд, вильыш челядысь поліс, а мужичөйяслы пөщада эз

сетлы. Кыдз дйтшнитас коскад — сажень лэбзян. Кы-  
пөдчан, а сійө выльысь нин метитчө...

Межыд тай кызди вувзысис ме вылө, дзик тигр  
моз! Чепөсси отилаө, мөдлаө. Меж вөтлысьө, вот-вот  
суөдас.

— Чеччышт татчө, чеччышт! — горзөны меным ка-  
нава сайсянныс.

Канава паськыд, он кө во мөдарас да усян — нй-  
төссян. А меж кө суөдас — люкалас да таялас, мича  
костюм лякөсьтас. Мый лоны лоө. Кыдз тай звиркниті-  
чеччышти синмөс куньөмөн! Вои мөдарад, мыні злөдей-  
межысь. Кутісны менө, мед ог усь.

Зонъяс шензьөны.

— Молодеч, Мишка! Тэ тай чемпион. Видзөдтө,  
мый пасьта канава өдөлитін!

А ме ачым ог эскы, мый верми чеччыштны та  
ылнаө. Дивө!

— А мый, Мишка, — шуөны меным, — тэныд ков-  
мас участвуйтны ордйысьөмын. Райцентрө лэччам да  
тадз кө чеччыштан, мян команда оз омөль места  
босьт.

Межөс нывъяс беддён вөтлісны, вайөдісны менө  
чеччаланінө. Көтөрти, өддзөдчи, чеччышти — эг во.

— Тэ, Мишка, бара тай ас вылад он надейтчы, —  
шуөны. — Тэ сідз чеччышт, быттьө тэ бөрся меж вөтчө.

Пиньясөс мурч-курччөмөн чеччышти. Вои! Мөдысь  
дай коймөдысь вои. Ошкөны менө, ещө ёнджыка  
ызийөдөны.

Быттьө бордъяс менам быдмисны. И ме вөлөм  
верма йөзсьыс не омөльджыка чеччавны. Ас вылө на-  
дея лои, а сійө өд медся главнөйыс. Быд лун куті  
упражняйтчыны, сэсся ордйысьөмъясын участвуйтны,  
ёнми... И вот, со өні тэно чеччавны велөда! — нюмь-  
өвтіс Михаил Иванович да тапнитіс пельпомө. — Вай  
чеччыштам!

Аттө, дивө! Збыль өмөй ог вермы? Верма! Михаил  
Иванович тай нө сяммөма! Верма, чөрт мед менө лю-  
калас.

Өддзөдчи, котөрта. Сынөдыс шутьялө пельын...  
Гоп!.. Ура, чеччышти! Эг и крукасьлы!

## РАДЕЙТЫСЬ НЫВ



она Иванчик, сёшайт, сьёлөмшөр!  
Гижа тэн письмө. Лэб, письмө, Иван-  
чиклы сьёлөмас, сөмын эн крукась дөрөмас.  
Кнопка нырөй тэ, Иванөй, гаж тэысь ёна быри, да сө-  
мын ылын тэ. Малышти эськө тэнсьыд шабді кудель  
юрситө, сьод сэтөр синьястө, кумли кодь мыштө, да  
оз нин, тыдалө, удайтчы!

Иванчик, тэ өд менө ёна радейтлін! Помнитан, тэ  
өшинь улын коркө кодзыд төлын сулалін, менө сви-  
данье вылө виччысин? Ме куим час зеркалө водзын  
тшапитчи. Первой кудритчи, сэсся пудритчи, сэсся кра-  
ситчи, сэсся баситчи, а тэ, коньөр, век лым тола бокин  
тірзин-кынмин. Мам шмонитіс, йизяс пө тадзинад тіян  
любовныд. А ме сэсся нарoшнө эг и пет тэ дінө. Ви-  
дзөдла, мися, ёна-ө любитан. Збыльысь, вөлөм, радей-  
тан, эн весиг и видчышт.

Мөд мыж менам вөлі, кор карысь кутшөмкө инже-  
нер воліс да ме ськөд гуляйтышти. Фамилиясө ме сы-  
лысь эг и слөймы юавны, нимыс тай Роберт вөлі-а.  
Көсйысис менө вайны да, бесыд, сідзи и пөръяліс.  
Веськыда шуа — вайис кө, дерт, муні. Инженер өд оз  
этша пөлучайт, дай аслас «Победа» пө эм. Көсйысьліс  
менө кагаос моз видзны, моздорас вөдитны. Мамө ёна  
тшөктыліс сы сайө мунны, да он тай пытш моз чеч-  
чышт питшөгас, оз кө вай! Төді кө, мый тадзи лоө,  
эськө эг и видзөдлы сы вылө. Тэ, коньөрөй, зэв жаль  
вөлін, шогсин ёна, но гөгөрво менө: чери корсьө, көні

пыдынджык, морт — кӧнӧ лӧсьыдджык. Тэ вылӧ ме некор ог кут ӧбжайтчыны. Прӧститӧн менӧ да бара кутӧн важмозыд радейтны. Ньӧбалӧн быдсикас пӧдаркияс, кӧть эськӧ тэнад, колхознӧй пастухлӧн, эз вӧв зэв уна деньга. Сэки колхозад зэв на этша деньгатӧ трудодень вылад сетлисны. Тӧдӧ ӧмӧй ме, мый миян колхоз сэтшӧм ӧдӧй озырмас! Ӧнӧ на ме тӧн ньӧбӧм шӧвк шарпиктӧ новла да тӧнӧ казтыла. Сьӧлӧм бердӧ топӧда шарпиктӧ да шуа: ок, мися, Иванчик, Иванчик.

А помнитан, кызди ми тӧкӧд заводитлим гӧтрасьны! Тэ полӧн, мый менӧ бара кутшӧмкӧ инженер мырдяс да зӧлин ӧдӧйджык менӧ босытны гӧтыр вылӧ. А мамӧ век видчис.

— Йӧй, эн мун сы сайӧ!— горӧдас вӧлӧ.— Пастух сайӧ он жӧ мун. Кутшӧм сылӧн, пастухлӧн, нажӧтка! Қорсь служащӧйӧс. Деньга лӧӧ дай уджтӧг видзны кутас.

Ме мамлысь кывзыси. Қодӧ нӧ ӧткажитчас уджавтӧг овны озыр мужик сайын! Луншӧрӧдз позьӧ узыны, какао да кофеяс юны, шӧвкъясӧн да мантоясӧн вӧччыны. Дерт, вежыд петас. Мамӧ кӧть йӧйӧн шуӧ, а ме, ачыд тӧдан, абу йӧй. (Гижа тэныд ставсӧ, мед тэ гӧгӧрвоан да прӧститан.) И тӧдмаси ме гусьӧникӧн ОРС-са бухгалтеркӧд. Дерт, сӧйӧ тэ серти быттьӧ гулю дӧнын сюзь. Нырыс картофель кодь, пельыс лапкор кодь, кокыс коса кодь, сы вӧсна мый пӧрысь. Но мый вӧчан, «любовь зла, полюбишь и козла». Миян костын, дерт, некутшӧм любовь эз вӧв, сӧмын мамӧ ышӧдӧс. Мед сӧйӧс коркӧ чӧртъяс скӧвӧрӧда вылын жаритасны!

— Тысяча дай кыксӧ шайт пӧ босытӧ,— ӧтарӧ долис, — мун сы сайӧ, мун, кужан кӧ. Красуйтчыны кутан, вый пиын туплясьны, шӧвк пиын сунласьны.

Долис да долис, сэсся и ышти. Мам мыжа, ме ньӧти абу мыжа. Ышти, но эг на дзикӧдз, падъялӧ.

Ми ӧд тӧкӧд мӧдӧдчылӧм нин гижсьыны. Помнитан, дерт, оз ӧд вун. Тэ вӧлӧ сэтшӧма вӧччӧмыд, дай ме лунджынсӧ вежняси зеркалӧ водзын да пасьтаси сӧдзи, мый ӧдвакӧ артисткаяслы удайтчывлӧ сӧдзи вӧччынысӧ. Ме та кузя мастерица! Рӧдвуж чукӧрмис керка-тыр, ставныс поздравляйтӧны, ошкӧны. Тэ да тэнад рӧдвужыд сӧнӧсь жӧ. Кутшӧм лӧсьыд, гажа! Ме тэныд сетӧ ассым паспорт да мӧдӧдчим сельсӧветӧ. Лоим эськӧ шуда гозьяӧн, но туй вылас вӧлӧм кыйӧдчӧ бух-

галтерыд (сійӧс и нимнас ог кӧсйы шуны, кӧть сійӧ и менам мужик). Дум вылӧ усины мамӧлӧн кывъясыс и... нэм лоӧ яндзим, мый ме тэныд шуи:

— Иван, вай бӧр бергӧдчам. Гижсям коркӧ... мӧдысь. Ме талун ог кӧсйы.

Тэ шӧйӧвошӧмӧн видзӧдлин ме вылӧ. Матын шпыннылис бухгалтер. Тэ гӧрдӧдін, югнитін синъяснад да бергӧдчин, мунін юртӧ ӧшӧдӧмӧн. Ак, позьӧ кӧ тайӧс бӧр бергӧдны. Йӧй тэ, Дуня, йӧй! Мыйла тэ мунін сельсӧветӧ лӧг петкӧдлысь бухгалтерыскӧд?

Муні дай ставыс. Ассьыд гыррдзатӧ ӧні он курчы. Бухгалтер вӧлӧм шыш, гусясьӧ кладовщиккӧд ӧтвылысь. Меным нинӧм эз и удит ньӧбны, пуксьӧдісны. Кӧть мед ӧти манто ньӧбис! Вӧлӧма ӧд деньгаыс, да гусьӧн видзӧма, меным эз и висьтавлы.


А неважӧн лыдди тэ йылысь газетаысь дзонь статья. Тэ тай вӧлӧм знатнӧй морт да меным он и висьтав! Мӧсьясӧс пӧ сэтшӧм бура видзӧмыд, ылӧдз славитчан. Почётнӧй грамота пӧ тэныд сетӧмаӧсь, слёт вылын ошкӧмаӧсь. Уна-ӧ деньга да нянь пӧлучитӧмыд — стӧча тӧда, колхоз правлениеӧ ветлі юавны. Сы мында висьталісны, весиг юр вежӧрӧй вошли. Прӧзевайті ме ассьым шудӧс! Мен, коньӧрлы, таво зэв этша воӧ. Шогся, уджыс киӧ оз пыр.

Иванчик, гашкӧ, вылысь тӧдмасям? Ме тэнӧ кута воддзамоз жӧ радейтны. Тэ гӧтыртӧм на, ме ӧні тожӧ мужиктӧм. Вай бара кутам любитчыны. Сӧгласитчы, Иванушко.

Тэнсьыд виччыся ме вочакыв.

Дуня Қисова, тэнӧ радейтысь ныв».

## ӨМИДЗ РӨМА ПЛАТЬЕ

риша Амосов, карса өти учреждениеысь бухгалтер, надзöник локтис гортас. Сийö ветлис вежон кежлö командировкаö районö, вöли нин бырöма гажыс гортсыс, и та вöсна аслас казавтöг кокъясыс кутисны вөрны тэрыбджыка. Но кор дум вылас усъли пинясысь гöтырыс — Ленаыс, пыр жö надзмöдлис воськовъяссö да шутьлялигтыр öчки пырыс дзоргис паныдасысь нывъяс чужöм вылö, сравнивайтис налысь мичлунсö.

Гриша да Лена олісны öтлаын мöд во нин. Тöлысь кымын «любитчöм» бöрын найö корсисны ыджыдджык квартира да гижсисны, и первойсö семейнöй олöмыс кыкнанныслы зэв ёна кажитчис. Гриша велöдчис квайт тöлысья курсъяс вылын да кутис уджавны бухгалтерөн, а Лена, мудзлытöм почтальонша, сдایتис кучик сумкасö да босьтчис гортса овмös нуöдны. Тайö реорганизациялы медся ыджыд помкаөн вöли еджыд юрсиа Славик, кодi сутки чöж ыджыдавлис аслас шöйöвöшöм «подчинённöй» вылын.

Леналөн надзöник вежсис чужöмбаныс, кельдöдiс алöй биыс бандзибъясыс, стрөгöсь, а мукöддырйи зэв скөрöсь лоліны карöй синъясыс. Быд неладнöджык кывйысь Лена заводитлис видчыны, а сэсся ачыс жö бöрдлывліс. Вежсис и гажа, серамбана характерыс Гришалөн. Мужскöй авторитет дорйöм вöсна Гриша зілис видöм вылö вочавидзны сідз, медым тшöкмунас «тайö невежаыс» да мичаа вöччöмөн öдйöджык мунлис гортсыс.

Пыр шочджыка Григорий ветлывліс юкмөс дорё вала, поткөдліс да пыртліс пес — став гортса удж водліс көзьяка пельпомьяс вылө. Та пыдди мужиклөн зарплатаысь гөтырлы веськавліс ичөтджык юкөныс: Гриша төждысис не сөмын аслас паськөм вөсна, но и зілис кытшавны асьсө «культурной» көлуйөн — лөсьөдіс фотоаппарат, баян, а неважөн кыськө кыскис ыджыд бемскөй стеклө да пуктіс өбедайтан пызан шөрө.

Бемскөй стеклө вөсна гозья костын кыптіс ыджыд шум.

— Прөстыняыд косясьлөма, вежнытө наволочкаыд абу, меным йөзө петны нинөмөн, а тэ пөлөс кока пызан вылө чунь кыза стеклөяс ньөбалан! — шумитіс гөтыр. — Петкөда да лым толаө шыбита тэнсьыд стеклөтө!

— Невежда тэ, невежда! — мургис гөтыр вылас Гриша. — Быд культурной мортлөн керкаас татшөм стеклөа пызаныс эм. Менө, гашкө, регыд пуктасны главной бухгалтерө. Тэ культурной эн на удит быдмыны, сійөн и он гөгөрво менө, пыр пинясян, көть пышйы гортсьыд.

— Он и тай воывлы прамөясө.

— Дзикөдз ог кут воыны. Сэки казялан.

Гриша бөрья кадө некымынысь нин мөвпыштліс, мый олөмыс налөн абу нормальной, мыйкө колө вөчны, медым гортыс бөр лои уютной, кытөн эськө позис спокойной да нимкодя шойччыны. Но кызди мужчина морт, кодлөн эм аслас достоинство, ыджыд воля да чорыд, кусынтны позьтөм характер, Гриша эз көсий сетчыны нывбаба власть улө, пөтачитны сылөн капризьяслы, веськавны гөтыр каблук улө.

— Ме кута тэнсьыд кывзысьны?! — командировка мунтөдз сійө гримөдіс кулакнас пызанө. — Тэ менсьым кывзысь! Кыдзи меным кажитчө, ме сідзи и ола!

Өні, вежон кежлө торьявлөм бөрын, Григорийлы аслыс тайө кывьясыс кутісны кажитчыны лишной ёсьөн, грубойөн. Оз, дерт, тадзи вөлі ков сёрнитны гөтыркөд. Вывті ёна ыджыдалысь мужикьясөс гөтырьяс оз радейтны, весиг ненавидитөны. А кутшөм мужиклы лөсьыдджыка овсьө: кодөс гөтырыс ненавидитө либө кодөс радейтө? Григорий весиг серөктыштіс — өтветыс ачыс вөзйысис. Сылы зэв лои нимкодь тайө прөстөй истинасьыс, коді өні друг югьөвтис вежөрас да

восьтіс сэтшөм важнойтор. Водзөвылө лоо дугдыны Леналы чорыд кывъяс воча шуалөмысь. Колө, тыдалө, мөвпалыштны, мый ещө вөчны, медым Лена бөр заводитіс сійөс радейтны.

Мыйон тыдовтчис нейджыд важ керка, көні вөлі Амосов гозъялөн квартираыс, Гриша гөгөрвоис, мый сылөн гажыс бырис не тайө руд керкасыс да сы пытшкын ичөтик комнатаысь, а банйыштөм еджыд булки кодь Леночкаысь да ичөтик писыс. Торъявлөм, буракө, збылысь ёнмөдө гозъя костын бур чувствояс. Та йылысь Григорий кывлывліс нин. Оні сійө ас сертиыс казяліс, мый тайө збыль.

Кильчө вылө кайигөн Амосов аддзис перилө бокысь деньга. Синмыслы эскытөг копыртчис да лэптис сө шайта вит билет, кодъясөс вөлі отлаө гартыштөма. Разис найөс да недыр чуймөмөн дзоргис листъяс вылө, сэсся тэрмасьмөмөн деньгасө сюйис гач зептас да кыйкнитліс гөгөрбок.

Улича вөлі тыртөм. Надзөник уси лым. Кок туйяс некодлөн эз төдчыны.

«Ныла-зонма тані, тыдалө, войнас сулалөмаось,— нюмуніс Гриша.— Зонмыс, көнкө, нылыслысь кепысьсө босьтіс да зептас сюйис, а сійө кутіс бөр мырддыны. Но, и өттшөтш деньгасө зонмыслысь уськөдіс!— Григорий серөктіс, сылы дум вылас уси нывъяскөд аслас дурлывлөмыс.— Код сэсся тані деньгасө воштас! Гыжъялө, көнкө, ассыс балябөжсө, да деньгатө босьтны, вокө, некысь!.. Но, татшөм деньгатө абу и грек видзны. Мед, колөкө, эз уськөдны дай!»

Чемоданчикөн и быдөн Гриша бөр мөдөдчис кар шөрлань. Некымын квартал прөйдитөм бөрын сійө воис универмагө. Витсө шайт. Мый ньөбны? Костюмъяс — зэв донаось, куим та мында деньга колө. Шляпа Гришалөн эм нин. Со дөрөмъяс... Ставыс кутшөмкө мисьтөмөсь. Григорийлөн синъяс кодзлалісны прилавокъяс да полкаяс кузьта, но нинөм эз аддзыны прамөйджыксө. Колө вөлі босьтны ыджыдджыктор, стөч витсө шайт дон, медым сэсся ёртъясылы весиг петкөдлыны да ошйысьыштны татшөм шуда аддзөмторнас. Мый жө ньөбны? Валегияс?.. Рудөсь, зэв паськыд гөленяось. Гудөк?.. Колө эськө да... Тьфу, эм өд нин гудөкыс!

Друг аддзис ярлык «500 шайт». Григорий матыстчис. Сійö ярлыксö вöли öшөдöма öмидз рöма платье бердö. Мича рöмыс, мича! Григорий думыштис, кызди сійö выль во дырйи локтас театрö гöтырыскöд, Ленакöд, код вылын лоö тайö платьеыс. Морöсьяссö со мичмөдöма эзысь узорьясөн. А збыль öд, лöсялас Леналы тайö платьеыс!

Киас ыджыд пакетөн гортас пырём бöрын Григорий аддзис Ленаöс плита дорысь. Векныдик, ёсь синкымьяс увсянныс сылөн синьясыс жугыля видзöдисны пач би вылö. Ичöтик гöгрöс вомдорьясыс, кодьясöс сэтшöма радейтлис водзджык окавны Гриша, мыйкö шöпнитисны. Лена сувтис стен бокö да кöдзыда видзöдис Григорий вылö.

— Здравствуй, Леночка,— кыз позьö небыдджыка шыасис сійö.— Ме тэн, Леночка, пöдарок вайи командировкаысь, он кö кут видчыны.— Сійö серöктис да тапнитис гöтырсö пельпомöдыс.

Лена, век на кöдзыд чужöма, матыстчис пызан дорö да паськöдис бумага тубрассö. Югнитис платьеелөн эзысь рöма вышивка. Пызан вылас быттьö öзйис гажа чим гöрднас асья кыа, да сылөн нимкодь югöрыс вуджис и Лена чужöм вылö. Сійö нюммунис да лэптис платьеесö чуныяс йылас, сэсся топöдис морöс бердас.

Лена нимкодясис да зеркалö водзын дугдывтöг бергалис выль платьеөн. Гриша сидзжö нимкодясис да, платье вылысь чукурьяс веськöдлём помка пунктöмөн, зилис унджыкысь малыштны гöтырсö зумыд морöс да мыш кузяыс. Гозья радлисны, сералисны, шутитисны. Лена кажитчис öни сэтшöм мича, мый Григорий эз вермы вештыны сы вылысь синьяссö. «Некутшöм ныв вылö ог веж, мед кöть и пинясьö,— мөвпыштис сійö.— Шань менам гöтырöй!» И важөн нин тöдлывтём радейтана пöсь чувство кыптис сылөн сьөлöмас, а кыис мелиа малыштис Ленаöс небыд юрсидыс.

— А кывзы, Гриша,— верöсыслы веськыда синмас видзöдигтыр лöня шуис Лена,— мый ме кöсья тэн висьтавны. Вай сэсся некор огö кутöй видны öта-мöднымöс. Сидз öд?— Лена нюммунис да юрсö топöдис Григорий морöс бердö.— Меным тэтöг зэв гажтём вöли... Збыль ме шуа... И ме сэсся некор тэныд лёк кыв ог шулы... Бура кутам овны. Сидз, Гриша?

— Сідз, Лена.— Григорий видзодіс гётырыслён чуньяс вылө. Найö вөлі чорзёмаоьс, потласьöмаоьс. Григорий топөдіс чуньяссö вомдорас.— Ме тшөтш мыжа... Медся ёна мыжа. Ме ола барин моз тэ дінын. Быд рыт век кыйөдча кытчөкө мунны, а тэ век öтнад, кагаа. Быдтор ньöбала сöмын аслым... Яндзим меным öні лои...

— Нинөм, Гриша, оз ков,— Леналөн шөпкана гөлөсыс вөлі мелі, йиджис сьөлөмөдз, сійö, кажитчө, прөститіс не сöмын кольөм мыжъяссыйс, но и сійөясыйс, кодъяс лоасны водзö. Григорийлыс тайö гөлөсыс бергөдіс став ловсö. Сійö нетшыштчис, лэптыштис Ленаөс кыкнан ки вылас да нюмъялігтыр горөдіс:

— Ок, пета öні, менам аканьöй, да тöлысь кежлө пестö поткөдла, а ватö ваяла дзөнь ты, сöмын вот некытчө.

Лена тупкис сылысь вомсö.

— Кагасö садьмөдан!..

Сійö тэрыба пасьтасис да шуис мужикыслы:

— Ме, Гриша, ветла няньла да прөдуктала. Славикыд висьö да некытчө на эг вермы петавны. Садьмас кö, качайтышт.

Лена кватитіс сумкасö, видліс пытшкөссьыс, сэсся сүйис кияссö зепъясас; сылөн чужөмыс друг кельдөдіс.

— Мый лои, Лена?— повзис Григорий.

— Этатчө öнтай... деньга пуктылі. Магазино вөлі муна, Гриша, а Слава друг бөрддзис. Ывласяньыс бөр бергөдчи. Кытчө воши, ог төд.

Григорийлөн став пытшкөсыс көдзавліс, друг босьтіс йирмөг.

— Ноко, зептыд?— уськөдчис сійö.

Кыис сылөн сквөзь петіс веськыд зеп пырыс: пыдөсас вөлөма ыджыд розь.

— Кысь тэн деньгаыс?— сибдөм гөлөсөн юалис Григорий.

— Тэ денегатö эн кольлы, Гриша, а ме нö кызд кута овны?— мыжа гөлөсөн тэрыба висьталіс Лена.— Муні учреждениеад да кори авансөн тэнад удж доныс витсё шайт. А сэсся и... вошти.

Амосов шатовтчис. Тіралан киясөн сійö кутчысис өдзөс куричө. Видчан кывъяс сідзи и бергалісны кыв йылын, но... мыйлакө найö öні эз петны ортсö. Мыйла?

Курччөм вомдоръяс пырыс сійө сөмын скөрысь мурөс-  
тіс да сьөкыда лэччис улөс вылө.

Лена повзьөмөн видзөдіс мужикыс вылө да өт-  
тшөтш мурталіс синбөжнас, удитас-ө сійө чеччыштны  
ывлаө, уськөдчас кө Амосов сы вылө кулакъясөн.  
Дерт, татшөмторйыс эз на вөвлы, но код төдас, зон-  
дырся Григорий да өнія Григорий зэв ёна торъялөны.

Крөватын вөрзис Славик да вөсныдика горөдіс.  
Тайө мездіс Ленаөс мужик водзас шөйөвошөмөн сула-  
лөмысь. Сійө котөртіс кага дінө, кватитіс сійөс моз-  
дорас да пөшти сы моз жө ачыс бөрддзис.

Григорий надзөник кыпөдчис улөс вылысь. Мый  
вөчны? Висьтавны ставсө да петкөдлыны асьсө гөтыр  
водзын дуракөн? Оз позь. Но өд и деньга ньөти абу.  
Гудөк ньөбөм бөрын мый кольлі, командировкаын лөи  
бырөдөма. Мырддыны платьесө да бөр нуны магази-  
нө? Некедз оз позь! Öти-кө, Лена тайөс некор оз  
прөстит. А мөд-кө... Талун сійө некедз эз вермы Лена-  
өс өбидитны — ни делөөн, ни кывйөн. Эз вермы дай  
ставыс. Вежсис мыйкө сылөн сьөлөмын. О-о, сійө бур-  
джык асьыс дөрөмсө нуас, но Леналысь выль платье  
оз вөрзөд! Кыдз нө позь!

Григорий пуктіс кисө Лена пельпом вылө да лөня,  
сьөлөмсяныыс шуис:

— Нинөм, Лена, ме кө эм, нинөм миянөс оз пов-  
зьөд, весиг деньга вошөм. Ми өд өні на сёрнитчим:  
медся главнөйыс — некор не вензыны, бур олөм лө-  
сьөдны. Сідзкө, огө кутөй кутшөмкө витсө шайт вөсна  
нервьяснымөс тшыкөдны... Сідз өд, Лена?

— Сідз эськө да,— синвасорөн вочавидзис гөты-  
рыс,— век жө жаль! Петала ывлаас, гашкө, сэн на да?


— Эн корсьысь,— шеныштіс кинас Григорий.— Ме-  
нам локтігөн нин немтор эз вөв. Кодкө нуөма тыдалө.

Григорий ышлолалігтырйи пуксис пызан сайө гиж-  
ны учреждениеса взаимопомощь кассаө сьөм корөм  
йылысь заявление...

Неважөн Амосов гозъя каганысө мездорас босьтө-  
мөн мунісны туй кузя. Григорий да Лена меліа варо-  
витісны да видзөдлывлісны өта-мөд выланыс сэтшөм  
синмөн, мый весиг паныдасьысь пөч сувтовкерис да  
любуйтчыштіс наөн.

— Кутшөм авья гозъя!— шуис сійө.

## ЗБОЙ СТЕПАН

ти югуд төвся рытө Степан Степанович Куштысев да сьлөн гөтырыс Анна Андреевна локтисны гортаныс гөститанинысь. Степан Степанович, кынөмсө водзө чургөдөмөн, тэрыба рөдтис сись кодь стройной гөтыр бөрсяыс, медым не кольны сыысь.

Гөститигөн ёна варовитисны жуликъяс йылысь. Степан Степанович та кузя весиг вензис свөякыскөд. Свөякыс шуис, мый жуликъяс миян сознательной кадө сидзи жө шоча паныдасьлөны, кызди вөрын — ошъяс. Куштысев эз сөгласитчы ськөд да долис, мый жуликъясыс сы мында жө, мыйта колля воө пармаын уръяс.

— Чөв, эн сөр! — торкис сийөс свөякыс. — Откымынъяс, ми коддемыс, быдөнысь полам да сийөн и повзөдлысьыс уна. Көч тай нө аслас вуджөрысь весиг пышйө.

— Ме абу полысь рөдысь, — тшапа вочавидзис Степан Степанович, — но жуликтө кө аддза, ме пышъя жө. Он кө утөвт, верман юрнад ворссыны, а юртө өд магазинын оз вузавны! — Степан Степанович гораа серөктис аслас шутка вылө.

Свөякыс скөрмис сылы чужөмө серөктөмысь да Степанөс нимтис чипанөн. Куштысев збоя шамыртлис кабыръяссө да кыпөдчылис пызан сайын, но мыйөн аддзис, мый свөякыс лөсьөдчө ырыштчыны капуста тыра тасьтён, тэрыба сунис увлань.

Онi, улича кузя мунiгөн, Степан Степанович век на шамралiс кулакъяссö.

— Ме сылы петкöдла чипан!— ропкис сийö.— Герой лоöма, капуста тасьтiөн ыршасьö! Аддзывли ме сэтшöмъястö. Менам чальчунь дон, гашкö, оз сулав-а, ышнясьö!

Сюра тöлысь збоя шлывгис небесати. Шочиник кымөръяс кыз быттьö сылисны сылөн ёсь мечьяс кодь югөръясын.

Керкаясыс вöлины гажтöмось, а вуджөръясыс налөн сьöдось. Некөн весиг пон оз тьякнит. Степан Степановичлысь сьöлöмсö быттьö кодкö кутiс шамравны кодзыд киясөн. Сийö жугыля кыйкъялис шуштöм заборъяс вылö. А мый, кодкö кö сесь петас да пинь пырыс сöздодас: «А ноко, пöрччы пальтотö!»

Куштысев татшöм сёрöдзыд некор на эз ветлыв. Шутка öмöй — кык час вой! Степан Степановичлы дум вылас усины висетьясыс, кодьясöс кывлис. Öтилысь часiсö нетшыштöмаось, мöдöс пöрччöдöмаось... Бурджык та йылысь не мөвпавны!

Кежисны переулокö. Гортныс нин вöли вит-квaйт керка сайын. Со нин тыдалöны Степан Степановичлөн керка öшиньясыс. И друг...

Унатор олöмас вöчсьö друг. Туй шöрысь сийö казялис некымын мужикöс. Вöлины-ö вит морт, али сöмын кыкөн — Степан Степанович стöча эськö эз вермы висьтавны. Сылөн гöгрöсмöм синьясын тайö мужикъясыс, а гашкö и зонъясыс содiсны, кыптiсны, кажитчисны важ книгагасын умбо-юмбо племяса дикарьяс кодь скөрöсь. «Портманеттö, часiтö сөрвитасны!— вирдовтiс Куштысевлөн юрын,— выль костюмтö мырддясны». Сийö швырк бергöдчылис öтарö-мöдарö — некөн некод дорйысь абу.

Орччөн — забор. Öти сувтса пöв чегöма. Пышйыны! Гöтырыс — Анна Андреевнаыс бергöдчис сылань, тыдалö, гөгөрвоис, мый Степанкöд неладнö. Степанлы кажитчис, мый и сийö тшöтш повзьöма. Пышйыны! Гöтыр вöтчас, а оз кö... Оз кö и мед оз. Мед асьсö и мыждö.

Забор вомөн — звирк! Йöра моз чеччалiс ляпкалöмлым кузя. Мöдар пельöсас — гидня. Кавшасис пельöс-тиыс вевт вылас, мед вуджны орчча йöрас. Сутшкысис пидзöсыс ёсьö, тыдалö, кöрт тувйö. Чашмунi гачко-

кыс, ори лестукөн. Путкыльтчис увлань юрөн, сунгысис толаё. Уси шапкаыс. Көдзыд лымйыс тупкис пöсялём чужёмсö. Тэрыба видзöдліс гөгөрбок — шапка эз сюр... Гашкө вötөдöны нин? Пышйыны öдйöджык! Келіс водзö сьöкыда лолалігтырйи.

— Сте-е-пан!

Горзіс гöтырыс. Грабитöны, тыдалö. Жаль, но мый вöчан? Час, локтас гортас, босьтас пищаль да чепйыв понкөд öтвылысь волас мездыны. Öдйöджык, öдйöджык!

Уф, со нин медбөръя потшöс. Колö жö сэтчö крукасьны! Нетшыштчис, резьді пальто соспöлыс. Көть эськө дзикöдз эз ор. Чотігтыр лётіктіс кильчö дорö. Ваысь кыскөм чери моз паськөдліс вомсö. Сьölöмыс сэтшöма тіпкис, быттö лөсьöдчис чеччыштны вом пырыс.

Туй вылын мыччысис гöтырыс. Пальтоа — кызди и вöлі. Весиг сумкаыс киас. Локтіс, кутіс броткыны:

— Тестьтö да шуринтö аддзин дай пышйин? Гөсть-яссö тадзи öмöй примитлöны? Абу и яндзим?

## РЕВИЗОР



**К**одос нө пуктамө ревизорас?— кыз гөлөснас юалис председатель Карпө Ёгор да кытшов-тис синъяснас медводдза скамьяс вылын пукалысьясос. «Аттө, колөма водзвыв сёрнитчыны,— мөвпыштис сийө.— Мед эськө эз веськав кутшөмкө немруй».

Тыдалө, кладовщик Якө Гриш сы йылысь жө мөвпалөма. Куньыштөм синъяснас сийө видзөдліс öтарөмөдарө да ыджыд тушанас чеччыштлис, быттьө сийөс сутшкисны шылаөн.

— Айпалөс пуктамө ревизорас!— горөдіс сийө.

— Айпалөс, сідзкө? Қызди мый, шогмас оз?— бара юалис Карпө Ёгор.

Мужикъяс чөв олісны. Қодкө нывбабаяс пиысь чилөстіс:

— Позьө! Мортыс зіль, оз ю, оз тышкась.

Председатель корис гөлөсуйтны, и унджыкыс ләптисны кияссө. Айпал Қызьюров лои ревизионной комиссияса председательөн.

Чинө воөм бөрын Айпал эз вежсы, эз тшапмы. Водз өд пөшти быд празник асылө йөз серавлісны сы вылын. Петас вөлі Айпал мичаа вөччөмөн, вышивайтөм еджыд дөрөма, галифе гача. Тотшъялө-ветлөдлө либө сельпо кильчө вылын пукалө, синсө читкыралө. И петас кө вөлі туй вылө Якө Гриш да шавксьөдны кутас Қызьюров динө, Айпал чөпөсьяс места вывсьыс да заводитас пышйыны сыысь. Йөзыс сералөны, гор-

зöны:— Кут, Гриш, кут! А Айпал сöмын лэбзьö, йöй кöчысь тэрыбджыка.

Код тöдас, мый вöсна тадзи повліс Айпал Якö Гришысь. Пельбокас пö коркö лöсыштлöма томдырйиыс Гришyd. И мукöдъяс водзын рам вöлі Айпал. Век чöв оліс, некор эз шыасьлыв собраниеяс вылын.

И вот чöв олысь Айпал воис ревизорö. Сетісны сылы руд чусмöм папка. Ревизионнöй комиссияса выль председатель малалыштіс папкасö да шыбитіс сі-йöс правлениеса шкап вылö. Öні на папкаыс сэн куйлö.

Казялісны йöзыс: Айпал кутіс тшöкыда довъявны колхознöй складъяс дорті. Ветлöдлö сійö сэн, мыйкö кыйöдö, весиг, кажитчö, нырнас сынöдсö исалö. Чусмöм пинжака, руд гача, блин кодь кепкаа — амбар стенъяс дінас оз и тöдчы, сöмын синъясыс кодзлалöны, быттö шыръяс кыйкъялöны. Прöйдитысь бабаяс сералісны öтчyd Айпалöс.

— Мый нö шыш моз кыйкъялан? Тэ öд öні ревизор! Вöч ревизия Якö Гришлы, эрдöд сылысь гусясьöмсö.

— Оз öд лысьт Айпалыд, полö Гришсьыд, нöйтас. Айпал дözмис, югъөвтіс синъяснас.

— Уна ревизия нин Гришydлы вöчлісны,— шуис,— но некод на сійöс, мудер ручöс, эз вермы кыйны. А ме ревизиятöгыс кыя!

— Кыян тэ, кысь нин!

Водз асылö, кор шутьляліс чизыр арся тöv да скöрысь резіс öшиньясö кодзыд зэр ваөн, Айпал казяліс туйыввса няйтысь шобді тусьяс. Со некымын тусь, со тані канава бокас рудöдöм турун вылас дзонь кытыр. Öдйöджык склад дінö! Кöйдыс складсянь и заводитчö шобді тусьяслөн визьыс. А кытчö воас тайö визьыс, код керка дінö?

Знаменитöй сыщик Шерлок Холмс эськö эз на удит и джын туйсö прöйдитны, а Айпал Кызьюров вöлі нин Якö Гриш керка дінын. Шобді тусьясыд татчö вайöдісны!

Ыджыд да гажа керкаыс Гришлөн. Дзирдалö гöрд краскаөн кильчö поскыс, татшöм югыд да мича öдзöс вугсö и магазин öдзöсысь он аддзы. Пöлөвикъяс вылас полан тувчынытö — öшкамöшка рöмаöсь дзик.

Айпал öнi эз пов. Сийö тэрыба кайис кильчö вылö да нетшыштiс öдзöссö. Эз вoссы, игана. Дыр мысти букöстiс Гриш:

— Куд крещенöй?

— Ме, Айпал. Вoссыты.

— Виль ревизор! Пырав, пырав. Мый нин бурсö висьталан?— нюмъялис Гриш посводзас сулалiг.

— Мыйла шобдi кöйдыссö гусялин, шыш? Талун войнас новлöмыд?

Гришлөн вежсыйлис чужöмыс, но эз дугдыв нюмъялöмысь. Рыжöй синкым увсянныс скöрысь бугжылясисны арся няйт рöма синъясыс, но сэнi тöдчис и полöм.

— А мый серти тэ лысьтан тадзи шуны? Мыйла сöран?— ырыштчис пудджынъя кулакъяснас Гриш.

Айпал петитчыштiс, сылөн синъясыс кутiсны сырмыны. Гришлөн кабыр вылö видзöдлöмысь весиг сьöлöмыс тювкнитiс кытчöкö увлань, эз кö нин во кокпыдöсöдзыс. Но Айпал век жö лысьтiс шуны тiралан гөлöсөн:

— Кыдзи ревизионнöй председатель, ас синмөн аддзыли. Шобдiсö туй вылас киськалöмыд, туяли сы серти. Он, небось, соссы! Трудодень вылö шобдi кöйдыстö оз сетаवны.

Гриш тувччис öти вoськов Айпаллань, малыштiс усьяссö да нерыштiс Айпалöс:

— «Он соссы». А гашкö нарошнö тэ шобдiсö киськалин, медым менö вузавны, а?— Гришлөн паськыд синъясыс быттьö писькöдiсны Айпалöс.— Тэ тадзи кöсьян? Виа!

Гриш зырис Айпалöс паськыд морöснас.

— Мыйла тэ ме вылö воан?— мурзiс Гриш.— Тэ, гашкö, менсьым гöтырöс любитан, сийөн кöсьян менö тюрьмаö пуксьöдны? Висьтав, петö вежыд менам гöтыр вылö?

— Мый тэ, мый тэ, Григорей?— Айпал чуймис сылы татшöм мыж суйöмысь.— Да тэнад гöтыр вылö кö, шуам, меным гöтрасны тшöктасны, сюръя вывсьянь эськö чеччышта. Дзик öд сийö полöкалö! Нырыс картофель кодъ, вoмыс...

— А, менам гöтыр тэныд оз кажитчы!— Гриш ырыштчис, кабырыс кытшовтiс сынöдтиыс; Айпал уди-тiс копыртчыны да тювкнитны кильчö öдзöс косттi. Сийö, дерт, эз нин кыв, кыдзи серöктiс Гриш.

Недыр котөртөм бөрын Айпал сувтовкерис да грө-  
зитыштис Гришлөн керкалань:

— Всёравно ме тэныд петкөдла пуж! Велөда дорын  
узьлыны!

Кладовщик чайтис, мый öнi сийö дзикöдз нин пов-  
зьöдiс Айпалöс да мöдысь оз нин лысьт матö воськовт-  
ны складьяс бердö, кыйöдчыны Гриш бöрся. Шобдi  
кыйдыс эз сет Гришлы спокой, висьöдiс сылысь сьö-  
лöмсö, сулалiс син водзас. Гусявны, вайны гортö зарни  
рöма шобдiсö! Öд сийö йöртöдьясын куйлис ёна ун-  
джык документьясын пасийöдьяс серти...

Öти войö сикт кузя гудökөн довьялысь ныв-зон кы-  
лисны горзöм. Кывзысисны — горзö кодкö склад до-  
рын. Уськөдчисны сэтчö котөрөн гураньяс вомөн чеч-  
чалiг.

Чарла кодь тöлысьлөн кельыд югөрьясыс муртса  
югдöдисны амбарлысь стенсö. Амбар пыткас кодкö  
видчис медбөрья кывьясөн да сьökыда чужья-  
лис öдзöсас. Кыз öдзöсыс брунакылис, но эз сетчы.


— Öдйöджык локтöй! — горзiс öдзöссö потшкөн пы-  
кысь дядьö. Тайö вöли Айпал.

— Кути вөрös, кути! Тыртөм мешökьясөн пырис,  
шобдi гусявны!

Кöть Якö Гриш вом быгзытöдзыс долис, мый сийö  
ачыс пырис амбарас сы могысь, медым кыйöдны тöдтөм  
вөрös, некод сылы эз эскы. Дöзмөм йöзлөн тшöктөм  
серти сийö жö луннас кладовщикöс вöли вежöма.

— Вот тайö ревизор! — сёрнитисны йöз, кор вöли  
аддзасны туй кузя тэрыба мунысь Айпал Иванович  
Кызьюровös. — Мед кöть и рам, кутшөм шышкös кыйис!

26318



## СОДЕРЖАНИЕ

|                                   |    |
|-----------------------------------|----|
| Пестера-наберушкаа . . . . .      | 3  |
| Маша . . . . .                    | 9  |
| Мудер сосед . . . . .             | 13 |
| Коді вöлі машинаас . . . . .      | 16 |
| Гусьöн радейтысь . . . . .        | 20 |
| Порсьяс да председатель . . . . . | 24 |
| Мыйысь ошкисны Агнияöс . . . . .  | 27 |
| Невеста . . . . .                 | 32 |
| Қызди ме муні верöссайö . . . . . | 37 |
| Сьöлöмö ключ . . . . .            | 41 |
| Семёнлөн шудтöм лун . . . . .     | 45 |
| Спортсмен да меж . . . . .        | 49 |
| Радейтысь ныв . . . . .           | 52 |
| Öмидз рöма платье . . . . .       | 55 |
| Збой Степан . . . . .             | 61 |
| Ревизор . . . . .                 | 64 |

*Александр Михайлович Матвеев*

Я ИХ ВСТРЕЧАЛ

рассказы

на коми языке

Оформление С. Холопова

Редактор С. Морозов

Техн. редактор И. Цивунин

Сдано в набор 24/XII-58 г. Подписано к печати 20/IV-59 г. Формат 84×108<sup>1/32</sup>  
1,0 бум. лист. 3,28 печ. лист. (Уч.-изд. лист. 2,87) Тираж 2000 экз. Заказ № 4048.  
Ц00939. Коми книжное издательство. Дом печати. Цена 90 коп.

---

г. Сыктывкар, Республиканская типография Полиграфиздата  
Министерства культуры Коми АССР



90 к.

КОМИ КНИЖНОЙ ИЗДАТЕЛЬСТВО

1959